









曾文正公奏稿

卷之十一目錄

克復安福縣城摺

咸豐六年十二月二十三日

畢金科軍進剿勝仗摺

全日

劉于潯水師屢次勝仗摺

全日

附陳近日軍情請催各省協餉片

克復奉新縣城摺

咸豐七年正月十七日

官軍克建昌武甯兩湖軍收復各縣摺

全日

目疾請假摺

全日

報丁父憂摺

二月十六日



呈請代奏奔喪到籍日期摺

二月三十日

呈請代奏謝恩摺

三月二十六日

瀝陳下情懇請終制摺

五月二十二日

恭謝天恩并籲請開缺摺

六月初六日

瀝陳辦事艱難仍懇終制摺

全日

欽奉兩次諭旨覆奏摺

九月初九日

酌擬報銷大概規模摺

十二月初七日



克復安福縣城摺

咸豐六年十二月二十三日

奏爲周鳳山等一軍屢獲勝仗克復安福縣城恭摺馳奏仰祈  
聖鑒事竊照新授吉安府知府黃冕與前任湖北藩司夏廷樾  
前任廣東羅定協副將周鳳山共籌援師進剿吉安府業經臣  
等於十月十一日附片具奏在案嗣准湖南撫臣駱秉章咨稱  
派委臣國藩之弟曾國荃帶湘勇二千人先發黃冕夏廷樾隨  
後繼進等語曾國荃由萍鄉入周鳳山由萬載入約定會攻安  
福以趨吉郡十一月十二日周鳳山駐軍楓溪距安福城四十  
里次日五鼓行至清溪探報大嶺小嶺伏有賊匪攔截卽派守  
備劉之能等自左路進攻守備楊光福等自右路抄出初及交



鋒賊卽折回我軍乘勢追北殺賊數十名奪獲黃旗馬匹槍礮等件曾國荃亦於是日行至江口遇賊距安福尙三十餘里登高瞭望賊匪兩枝迤邐而來曾國荃派都司陳光孚拒其右蕭孚泗截其左而白率隊伍禦於中路有騎馬黃袍賊目六人突前我軍植立不動相距二丈許該逆亦不復進逼張開輯以劈山礮擬定一發立斃二賊奪馬與印羣賊遂紛紛獸散我軍三路抄追殺斃二百餘賊生擒十六人窮追三十里申刻卽抵安福克復縣城周鳳山亦卽入城安撫遺黎搜剿餘匪兩軍會合均紮東門之外此十三日兩路獲勝同克安福縣城之情形也嗣據探報稟稱通吉安之東路大汾楓田等處屯賊甚多約有

五六千人約期來撲官軍營壘十七日周鳳山等出隊分三路進兵曾國荃派都司蕭孚泗等由中路進周鳳山派守備劉之能等抄右路進歐啓貴等抄左路進該逆亦分三股迎敵槍礮雷轟自辰至午我軍堅不可撼該逆悉眾向右路衝突哨官李發枝奮勇直前刺取黃袍賊目一人賊勢小卻劉之能彭東貴何廷旺等大呼齊進刀矛摩戛斃賊二百餘名該匪敗竄追過大汾河十餘里奪獲旗幟繡帽龍袍槍械百餘件生擒十一人正擬移營進剿聞探得古城永新來援賊千餘屯集固江里田并驅還安福敗匪二千餘竄至竹江青一帶思據河以拒我軍十九日周鳳山率哨官劉之能楊光福等由河東北分五枝徑



擊竹江青之賊曾國荃率湘營由樓背洋口分三枝兜剿里田之賊周鳳山行三十里竹江青股匪已先遁矣曾國荃偵知賊在洋口對河之千金壇山上各弁勇赤身涉河賊見我軍至列一字陣於山腰有黃袍賊目四人擁隊前衝又伏賊一枝出隴中大村冀繞擊官軍之旁藍翎都司蕭孚泗陳光孚禦中左兩路而張開輯偃旗蛇行由右路抄出賊伏之外羣賊由山半乘高撲下槍礮兼施并放噴筒我軍靜寂無聲屹立不動賊下山甫逼我軍衝鋒擁進賊勢稍卻眾勇大隊趁之羣賊奔竄追殺五里至橋東村賊據石橋相拒思俟伏賊之勝卓旗回戰不意官軍追騎奄至刀矛相格張開輯之伏兵已從右路抄出伏賊

之旁中路之賊頓失所恃首尾不能相應遂大敗狂奔我軍窮追直至距營六十五里之固江亭子始行收隊奪獲洋槍礮械藤牌四百餘件旗幟尤多此十七十九日大汾里田兩次獲勝之情形也據周鳳山曾國荃等稟報前來臣等伏查吉安爲江西膏腴之地該逆悉力固守與瑞臨撫州并重茲幸克復安福疊獲勝仗乘此聲威圍攻吉郡或可迅速得手成上游建瓴之勢以固南贛天險之區所有周鳳山等一軍克復安福各緣由恭摺由驛馳奏伏乞

皇上聖鑒謹

奏



五

--	--	--	--	--	--	--	--	--	--

畢金科軍進剿勝仗摺

咸豐六年十二月二十三日

奏爲饒防一軍進剿泥灣等處疊獲勝仗鄱陽境內肅清恭摺  
奏祈

聖鑒事竊照饒州府城自六月克復以後防剿各情經臣等具  
奏在案嗣據雲南臨沅鎮都司畢金科升用都司林保等先後  
稟稱該逆屢次受創之後糾集都昌彭湖各處匪黨八千餘人  
盤踞鄱陽縣西北百餘里之泥灣一帶奸淫焚掠民不聊生紳  
民紛紛來營請兵畢金科等熟商該逆旣萃各處之賊竄踞泥  
灣勢必撲犯郡城與其使人薄我不若我先薄人遂定議於九  
月十三日進剿十四日至泥灣十五日黎明該逆約四五千人



分五股直撲我軍畢金科等亦分五路迎敵升用都司林保拒中路已革都司岳炳榮擊右路畢金科派千總龔廷貴把總朱洪章等分擊左路而自率親兵迎頭衝殺鏖戰數時該逆抵死不退畢金科下馬大呼衝入賊陣岳炳榮由松嶺之旁包襲賊後該逆首尾不能相顧遂如鳥獸散矣我軍乘勝窮追斃賊四百餘名生擒十二名奪獲旗幟刀矛馬匹無數次日仍回老營此十五日進剿泥灣賊匪大獲勝仗之情形也十一月十六日探報前竄饒州之聶張二賊由建德東流等處各聚悍賊數千與新到李邱二賊目所帶匪黨不日來犯官軍營壘畢金科等籌商以我軍僅二千人而賊眾數倍過之不可力勝但可智取

當派龔廷貴等五百餘人於初更時乘暗潛赴陶溪渡復派百餘人分布各路叢林埋伏以作疑兵十七日賊分兩路而來一由陶溪渡一由童子渡塵土漲天黃旗徧野龔廷貴等前夕已至由左路遠包以防童子渡之賊抄襲後路朱洪章等由右路繞過山後橫出以截之岳炳榮向前迎敵而自率親兵接應不逾時聞龔廷貴等已抄左路之賊之尾朱洪章等亦將右路之賊截爲兩段該逆分爲兩枝殊死鏖戰畢金科飭放號礮叢林中伏兵四起呼聲雷動畢金科縱馬衝突各哨弁亦迴合力擊無不以一當十賊黨大敗我軍兩路窮追至臥虎山青田埠兩處始行收隊殲斃及生擒共六百餘名此十七日在陶溪渡大



獲全勝之情形也二十三日紳民稟稱該逆經痛剿之後竄踞  
線洲地方催貢接搶民不堪命畢金科以鄱境未清終爲饒郡  
之患且聞調湖口之賊千餘約期大舉入犯遂於二十四日派  
隊前進二十五日黎明甫抵離線洲三里賊於望樓下點放信  
礮偵候之賊飛奔而退畢金科登高瞭望見該處四面皆山中  
橫一港兩岸民房數百間該逆已於兩路列陣而待畢金科派  
龔廷貴由西路進岳炳榮由東路進而自伏中路靜觀其變方  
接仗時民房之內伏賊齊起勢如潮湧我軍四面受敵幾不能  
支龔廷貴等躍馬衝陣斬大旗賊目一人中路親兵突起衝擊  
刀矛摩戛有聲雜以噴筒火箭該逆紛紛敗北畢金科截住橋

頭揜斬尤多賊多揭衣渡港我軍投鞭追之至村後金龍橋以  
山峻力疲卽行收隊是日擊斃及生揜者多係長髮老賊我軍  
亦傷亡十餘人此二十五日線洲接仗獲勝之情形也臣等伏  
查饒州一郡西接都湖北鄰皖南爲羣盜出沒之區畢金科等  
一軍僅二千人臣等慮其單薄常飭嚴守老營不宜輕出免致  
疏失畢金科以紳民屢次籲請遠出迎剿以少勝多鄱湖肅清  
辦理尙屬得法現仍飭其嚴加防守以固藩籬一俟鄂師進攻  
九江卽可調赴湖口水陸會剿所有饒防一軍屢次進剿獲勝  
緣由恭摺由驛馳奏伏乞

皇上聖鑒訓示施行謹

奏

奏和



劉于潯水師屢次勝仗摺

咸豐六年十二月二十三日

奏爲道員劉于潯一軍再克新淦縣城及在樟樹鎮屢獲勝仗  
恭摺馳奏仰祈

聖鑒事竊道員劉于潯一軍駐紮樟樹鎮屢次擊敗瑞河臨江  
河口賊船克復新淦爲上游之鎖鑰屢次具奏在案自十月以  
來據劉于潯先後稟稱九月之季水軍至上游黃山奪獲大木  
斛一次至臨江城下奪獲船礮二次十月之初焚剿茂林荷塘  
墟兩處賊卡者二次擊敗樟樹鎮撲營之賊者一次自撫州師  
潰臨江之賊數日增樟樹之警報頻聞而新淦縣克復之後未  
能分兵防守復爲賊黨所踞十月二十一日劉于潯督帶戰船

十五號飛划十二號寅夜前往襲之派陸勇三百隨船馳進黎  
明抵縣賊見我軍人數無多城池新葺竟敢負隅固拒蔡康業  
督廣勇攻北門白天佑帶川貴勇攻南門謝鳳高帶團勇攻東  
門以分賊勢西門濱江大河礮船白河下轟擊賊見四面受敵  
於城上擲下大黃旗兩次暫求解圍卽出投誠我軍自前夕二  
更至酉刻未得少息收隊傳餐因令百姓趕辦稻草暗置門洞  
裏以火藥噴筒射入頃刻火起城內鼎沸西門亦放火延燒槍  
礮乘之聲震山谷各勇梯足於肩緣城而入百姓跪稱賊已開  
南門逃走其存者概係長髮不辨是民是賊遂出南門追逐十  
餘里奪得旗幟刀矛入城安民賊存米鹽食物分給各勇當劉

于潯襲擊新淦之時臨江之賊乘虛來犯樟鎮老營從西岸突出李逢春派船上下迎擊管帶彰武軍謝得龍吳攀魁等亦出隊衝鋒廣勇川貴勇從隄內包裹該逆三次回旗返戰俱被我軍擊卻適新淦之師從上游歸來礮聲不絕羣賊一律敗退此二十二日再克新淦次日樟鎮交仗獲勝之情形也自袁州克復之後袁城敗賊二三千陸續至臨江城內不納在西岸沙湖屯駐撫州樂安復陷有賊三四千在東岸永泰屯駐聲言約會二十四日來樟樹鎮圍撲官軍營盤至期劉于潯派蔡康業帶廣勇白天佑帶川貴勇沿河直上謝得龍帶彰武軍謝鳳高帶團勇由隄內包裹專擊東岸之賊水師轟擊江中防西賊渡而



相援水師先至永泰賊匿隄下以避礮子廣勇川貴勇衝鋒出戰以人寡稍卻後彰武軍團勇繼至併力擊退臨河口有賊數百亦經礮船擊敗二十五日西岸之賊出二千餘來犯劉于潯令陸軍暫緩出隊礮船排列河口連斃數賊賊避匿隄裏廣勇川貴勇分兩路抄裏一人直前刺取首逆偽張指揮燼之奪其大旗賊盡敗退我軍水陸登岸追北十餘里始行收隊二十六日賊匪出隊來犯東西兩岸約共五六千名水陸弁勇各告奮勇登岸相持半日勝負未決劉于潯傳令收隊飭弁勇登舟飽餐賊仍站立兩岸不退并車載千斤重礮三四位臨河施放我軍飯畢劉于潯麾旗登岸我飽賊饑勇氣百倍賊黨亦自知餒

腹不可以久持徐徐引退我軍鼓譟乘之殺賊二百餘追北數里賊由隄裏奔命四散時已酉正矣二十七日賊復兩岸來犯東岸之賊以鄉音與廣勇相約曰我願投誠助官軍以攻西岸匪黨西岸之賊亦以鄉音相約曰我願投誠助官軍以攻東岸匪黨我軍方推心待之該逆忽放排槍傷官軍五人各弁勇憤甚登岸力戰我猛進則賊退我稍卻則賊又進刀矛對舉洞胷賊目迴合十餘次斃賊百餘我軍亦傷亡數十人二十八日復出隊鏖戰自辰至酉更番迭進賊眾皆百戰之餘頑鈍凶狡彼此互有殺傷此二十四以後五日苦戰之情形也該逆以數日未受大挫遂爲久踞之計距我軍五里杜家村一夜之中築起

礮台三座用木桶架砌中實以土外挖深濠十分堅固官軍礮  
船連環攻擊該逆卽藏匿礮台之內負固不出樟樹鎮兩岸民  
房皆賊時出時沒多寡不定劉于潯日夜籌思正不得所以破  
之之法適臣等派康國器水軍前往濟師二十九早至樟樹鎮  
各營因驟添勁旅歡欣鼓舞康國器之水勇尙未紮營一擁登  
岸劉于潯恐其初到不知地形囑令紮駐河灘派蔡康業帶水  
陸廣勇與之同進以禦中路派白天佑川貴勇團勇分股包裹  
派謝得龍帶彰武軍兩路接應派署臨江都司羅玉祥帶本營  
兵前導派戰船二十號牽制杜家村礮台之賊小划上下飛巡  
以迷賊目畱李逢春涂安邦水師兩營於樟鎮以固老營行抵



大隄望大小村莊黃旗徧插中有大營盤二座與杜家村礮台遙遙相對該逆分五隊迎敵馬隊當先勢如潮湧我軍初見恟懼卻退劉于濬帶親勇督隊大呼退奔者斬白天佑卓旗停駐彼此施放槍礮噴筒火毬連環拋擲相持不下康國器舁小礮食以羣子擊必命中賊稍畏懼劉于濬施放一窩蜂火箭賊遂潰敗我軍乘勝追北蔡康業匹馬衝突圍攻賊營縱火環燒衣服錢米堆積如山同時火起煙燄漲天連日受傷之賊與守營之賊敗歸之賊無一逃脫兩營旣焚軍威大振李逢春涂安邦亦卽帶勇登岸拆毀杜家村礮台三座是日之戰賊死於火死於礮死於刀子者約六百餘人我軍受傷者甚少二更後該逆

用民船紮成巨艘上載枯草數百石火藥十餘石意欲衝燒水  
營又被我哨船立刻擊散此二十九日蹋燬賊營及礮台之實  
在情形也伏查道員劉于潯自督帶水軍以來勸捐供支不盡  
取之官帑戰則身先功則歸人軍心民心樂爲效命此次臨江  
撫州之賊兩面環伺臣等深以眾寡不敵爲慮該道以水陸二  
千之眾拒凶悍三倍之賊實屬謀勇兼優記名道劉于潯籲懇  
天恩賞加巴圖魯名號蔡康業驍勇尤著懇請  
賞換花翎以示鼓勵其餘出力員弁可否容臣等擇尤保獎出  
白

聖主鴻施所有再克新淦縣城及樟樹鎮疊獲勝仗緣由恭摺

馳奏伏乞

皇上聖鑒訓示施行謹

奏





附陳近日軍情請催各省協餉片

咸豐六年十二月二十三日

再臣國藩於十二月初一日由江西省河赴吳城鎮與廣東惠潮嘉道彭玉麟商酌水師進剿事宜連日接據署湖北提督楊載福布政司銜李續賓函稟武漢蘄黃大冶興國三府七州縣於十一月底次第克復楊載福督水師於十一月二十九日直抵九江焚奪賊船殆盡李續賓督陸師進剿南岸賊匪於十二月初九日進攻九江府城臣展閱之下不勝怵慰查外江水師上年正月初五日經臣國藩奏明飭赴湖北援剿是時戰船或入內湖或爲風損僅存一百四十餘號駛至武昌今重來九江陸續添至四百餘號李續賓陸軍係上年八月遵

旨派赴湖北援剿是時羅澤南李續賓所帶湘寶各營僅五千人今重來九江添至八千餘人該二軍馳驅數省轉戰三年所向有功而江甯將軍都興阿統帶之馬隊亦由北岸以至小池口臣國藩於十八日由吳城馳赴九江迎勞諸軍見其軍威嚴肅士氣樸誠自十二至十八日環攻六晝夜并未收隊楊載福李續賓與都興阿聯絡契合愛敬交至雖積勞之後屢勝之餘猶復日夕兢兢衣不解帶不特東三省馬隊忠勇可風卽湘營與水師亦實爲不可多得之勁旅惟是餉項匱乏積欠口糧一百三十餘日臣等前次奏請山陝兩省每月各撥協餉三萬兩恭奉



恩旨飭令酌解數月現聞晉餉起解三萬兩已有一萬到江合無籲懇

天恩飭催山西陝西迅速籌解概交湖北撫臣胡林翼經收由水路解至九江專濟北軍之用至於江西各府尙有分駐兵勇五萬餘人舊欠無從補給新歲尤難支持合再瀝懇

天恩敕下兩廣督臣廣東撫臣於該省無論何款項下每月籌

撥銀四萬兩解至長沙由湖南撫臣駱秉章轉解江西以濟急

需能多發一日之餉則多收一日勁卒之用能早克一處之城

則早收一處錢漕之利臣等補苴無術迫切瀆陳不勝惶悚待

命之至除新到各軍接仗情形另行查明續奏外謹附片具

奏請

旨

克復奉新縣城摺

咸豐七年正月十七日

奏爲吳坤修一軍屢獲勝仗克復奉新縣城恭摺馳奏仰祈  
聖鑒事竊湖南候補知府吳坤修管帶鄂省援師來至瑞州分  
兵克復安義靖安圍攻奉新臣等擬調防廣信府城經三縣紳  
士御史帥方蔚等具稟請畱均由臣等奏明在案旋據吳坤修  
陸續稟稱十一月初八日探知建昌之賊將欲上犯安義派彰  
武軍丁峻長字營易桂修彪中營滕代富等馳往迎擊初九日  
賊匪撲城安義把總藍占魁衝其前彪營等自後策應佯北誘  
賊折回擊之割取首級者百有九顆追奔二十餘里保全安義  
縣城吳坤修以我軍分隊往援安義賊必乘虛攻撲遂飛函瑞



州約會副將普承堯於十一日來奉新助戰該逆果於是日蜂擁而來吳坤修掩旗息鼓佯示以怯該逆志得氣驕聲震山谷適普承堯率所部六百人至兩軍自武昌同來親如手足分軍數月忽然相聚歡欣鼓舞奮勇百倍該逆氣奪鑿戰三時賊黨大敗其悍者回撲愈猛擒斬愈多十三日賊復出搦戰我軍堅忍不動疲而擊之刀矛摩戛賊尸林積追逼近城吳坤修飭士眾少退避城上之賊礮該逆見我軍收回以爲敗怯悉力撲出寶勇分枝包抄勢如山壓斃賊計在六百以外官軍亦傷亡四十餘人藍翎外委余瑞林力戰殞命二十一日賊來誘敵我軍力戰窮追忽於樹林中衝出悍賊官軍小退傷亡近百吳坤修

愈近營則賊勢愈猛營壘且不能自保立馬麾眾與賊相搏死者曳歸後者復進苦戰經時賊旋敗竄次日復戰亦如之二十三日又戰亦如之二十四日逆黨大舉來犯我軍堅忍不出俟其情歸開壁逐之勢如潮湧賊遂大敗自有此數日苦戰士氣愈堅賊燄漸落奉新逆黨不敢復出而下游之建昌安義警報日三四至吳坤修於二十九日帶各營馳往安義救援奉新城內之賊乘虛出犯各營官守吳坤修堅立之法排隊岡嶺橫亙數里屹立如山卒亦以此取勝殺賊無算此十一月苦戰屢勝之情形也自二十一以後吳坤修於營外修築長濠立壩遏水每遇賊眾我寡之時利則前進否則阻水自固十二月初二

三月初十日十八九二十等日均與該逆接仗賊强悍而多吳坤修終守此法自立於不敗伺其隙而破之該逆遂於瑞州邀來悍賊於二十三日黎明乘天大霧來撲我營我軍寂然不動若漫無驚覺者廣賊本以槍礮擅長發必命中是日與官軍連環對擊自卯至申鏖戰六時除奪去賊尸受傷不計外尙割取首級八十四具從此賊膽已喪堅閉不出吳坤修料其不能固守此城矣但以官軍單薄甫及三千剿辦則有餘圍攻則不足乃嚴飭各鄉趕辦團練以相協助賊在奉新肆虐已久百姓恨之切骨紳士御史帥方蔚等督令比戶練丁各持器械二十七八九等夜賊由南門出城赴各鄉擄劫頃刻之間聚集團練數



萬人鳴鑼震天賊知官兵方盛團練又成不敢復出城半步聲息斷絕始有逃遁之意咸豐七年正月初五日吳坤修派隊直逼城下以火箭噴筒焚其更樓而以槍礮環擊傳齊三縣團練盡夜環攻使之不得休息二更時城上槍礮已稀各營由北門獅山梯繩而上縱火焚燒該逆由西南兩門奔竄列炬追殺斃賊極多三更時克復新城池藍翎把總陳有才手刃十餘賊中礮殞命初六七等日各營及四鄉團練遍搜山林民房生擒老賊二百二十一名寶勇追至大坵斬殺及瑞州營內截擊者均不在此數內百姓恨之切齒每生擒一賊輒剖腸剝皮腎樹礫石以雪其憤見者無不凜凜此十二月力戰疊勝及正月初

五日克復奉新縣城之情形也臣等伏查逆黨之在江西專以堅守爲長策自九江瑞臨等六府之外又以全力守湖口奉新二縣蓋以湖口與九江爲唇齒奉新與瑞臨爲犄角故也吳坤修自抵瑞州卽思先拔奉新以翦瑞賊之羽翼乃圍攻四月大小五十餘仗我兵傷亡至七百餘人之多尙賴團練協助乃克奪此堅城賊之凶很善守實有出於情理之外者湖南卽補知府吳坤修自鄂省率援師而來分兵獨攻奉新所辦捐款旣以供其本軍復能解濟省庫實屬謀勇兼優仰懇

天恩交軍機處記名以道員請

旨簡放候選知縣杜霖請免選本班以直隸州知州不論雙單

月遇缺卽選藍翎卽選從九品孔廣晉請免選本班以知縣畱  
於江西補用其餘營中員弁兵勇暨隨同出力之地方各官團  
練紳士可否容臣等開單酌保之處出自

聖主鴻恩藍翎把總陳有才請

旨飭部照守備例議卹藍翎外委余瑞林請照千總例議卹以  
慰忠魂所有疊戰獲勝克復奉新縣城緣由恭摺由驛馳奏伏  
乞

皇上聖鑒訓示施行謹

奏





官軍克建昌武甯兩湖軍收復各縣摺

咸豐七年正月十七日

奏爲官軍兩克建昌一復武甯及湖北官軍收復瑞昌德安湖南援師克復新喻永甯等縣城恭摺彙奏仰祈

聖鑒事竊查瑞州奉新經臣等分派大兵圍攻而由西迤北至

於九江中間建昌武甯德安瑞昌等縣數百里間均有逆黨盤

踞往來遙爲瑞奉聲援而建昌近接省城武甯近接興國州尤

爲賊匪出沒嘯聚之區吳坤修奉新一軍亦只能兼顧安義靖

安不能遠及建昌武甯十一月初六日臣等由省派令千總張

金璧帶九江兵從九品段起樊俊帶衡勇四百名馳赴建昌雕

剿初八日至老官嘴探知小河口有賊數千人初九日抵三角

湖焚燬把卡賊船二隻整齊隊伍分四路直撲小河口老巢賊亦分股迎敵鏖戰兩時之久未分勝負親兵丁世昌周高升等拋擲火毬十餘適中賊隊賊始敗退跟蹤力追殺斃溺斃四百餘名陣斬守城之吳賊目及來援之德安賊目卽將建昌縣城克復張金璧等帶勇旋省嗣聞該縣仍被德安之賊竄踞十二月初一日臣等復派張金璧段起樊俊等前往攻剿探知離馬路口二十里之蔴藉有賊千餘人離蔴藉二十里之灘頭有賊二千餘人存城之賊尙有千餘張金璧等初二日行抵馬路口適遇管帶平江勇投効之李元音正議進兵而蔴藉灘頭之賊聞風先遁是夜我軍宿半邊花橋山一帶初三日黎明張金璧



督同把總李華榮從九段起樊俊及投効之李元音前進賊於距城八里之廖姓村迎敵我軍四面兜擊追至河邊平江勇稍卻賊眾猛追張金璧等直前截之賊黨潰亂紛紛入城我兵四面環攻登山瞭望賊旗已靡親兵丁世昌周高升等首先登城衡勇繼之共斃賊五百餘名生擒二十三名奪獲黃袍黃褂旗幟五百餘件騾馬三十一匹此十一月初九日十二月初三日兩次克復建昌之實在情形也又疊據代理武甯縣候補府經歷冒溶稟報十月初八日賊匪千餘自紐絲嶺犯境舉人柯芬管帶平江勇李述攀駐紮橫路預定前後夾攻之計柯芬由東路潛繞賊後李述攀迎擊賊前行至芭蕉地方遇賊接仗礮斃

數賊嶺巖路狹難以成列我軍小卻賊蠡擁直撲勢幾不支而柯芬一軍之抄出口者已襲賊背賊倉皇回顧爲我兵擊殺五十餘名平江勇乘勢轉戰呼聲震山谷賊眾大潰由旁峽分竄又斃六十餘名生擒三名奪獲馬匹旗幟刀矛無算查點兵勇陣亡六十五名十八夜賊復分股撲營柯芬領大隊伏於嶺頭大營之右軍功黃量成督中營伏於嶺頭大營之左張瑞嵐等伏於楊神坪賊由清溪延山繞入意圖抄襲甫至楊神坪張瑞嵐等伏兵出其不意開礮轟擊斃賊多名其別路分進之賊聞敗回竄嶺頭左右伏兵齊出追殺數里賊多有顛崖墜澗死者二十三夜賊目張佩五率黨千餘由瑞昌王家鋪撲紫鹿嶺

營軍功羅燭予等帶勇先由僻路抄出賊後教職黃先鐸等督  
隊迎剿行至上莊猝與賊遇槍礮齊施斃十餘賊羅燭予等復  
從後截擊賊盡棄械越嶺而逃生擒張佩五別股賊目柯定耀  
帶數百人由羊腸山衝出亦經羅燭予擊卻之二十八日賊眾  
四千人由黃坊清溪港兩路入犯柯芬與黃量成議分三路迎  
剿賊盡銳撲左路黃量成督勇殺斃大旗賊目一名中右兩支  
乘勝衝出四圍兜擊斃賊百餘三十夜柯芬黃量成偵知賊在  
路口洪家源滋擾分派隊伍驀往圍剿獲勝十一月初一日賊  
數千人由瑞昌之王家鋪竄入上莊一帶經紫鹿嶺練勇迎擊  
眾寡不敵我兵小挫初五日賊忽閒道由建昌之猴子崖竄至



草坪冒溶督帶存城義勇及團勇又輔以童益彰之平江勇四  
 百名初七日擊賊於潘墩港連斃十餘賊乘勝直追賊愈集愈  
 眾我兵被困紛紛潰散縣城洵罹兵火陴堞不完賊撲城下冒  
 溶等退紮澧溪與舉人劉馨翰招集潰勇一面迅催橫路柯芬  
 黃量成之勇一面飭各團派兵助剿初十日賊出千餘人至石  
 口渡焚劫冒溶帶鄉勇二千餘名馳擊柯芬黃量成等橫路之  
 勇繼進適臣等飛調駐紮奉新之府經歷鄭奠管帶義武營先  
 到遇賊開仗并力夾攻斃賊百餘居民積苦荼毒怨恨入骨或  
 持木棍鋤鋏之屬助戰瓦石攢擊如雨諸軍人人思奮斬馘四  
 五百名逐北四十餘里是夜我軍駐距城八里之羅墩鄭奠因

賊膽已寒帶勇繞至西南山坡千聲大呼雜以槍礮冒浴亦率  
勇從南路堵截城內之賊逃去大半跌斃踐斃溺斃無算偽檢  
點李同偽將軍黃光手刃諸賊迄不能制十一日卯刻四面攻  
城賊由東門竄出皆爲鄉團擒殺立復縣城此十月初九十八  
等日屢獲勝仗十一月初七日先勝後挫兵單城陷初十十一  
大獲勝仗克復縣城之實在情形也又據布政使銜李續賓稟  
報自大冶興國追賊東下十二月初六日行次距瑞昌縣十里  
之亭子山該逆聞風遁去該縣署汛外委扈高發與紳耆率練  
勇抄擊殲賊多名生擒十二名內有偽探花舒三峯訊明正法  
奪獲黃風帽黃馬褂多件收復瑞昌縣城李續賓一面進駐九

江一面派兵收復德安縣城此十二月初五六等日鄂師抵潯收復瑞昌德安之實在情形也又據道員劉長佑稟稱十一月二十日探報新喻賊目偽將軍朱一點率眾二千勢將上竄劉長佑派隊馳赴分宜并催候選知府蕭啟江進屯洋橋互爲聲援二十三日三更賊果悉眾來犯一股進界首一股進界橋界首之賊抵離城五里白田地方楚勇奮擊破之界橋之賊亦爲汪正準親勇及團練所敗十二月初三日劉長佑率楚勇及投誠李能通之義勇千名由袁州赴分宜朱一點退踞新喻分股扼守寶山初八日我軍屯紮界首是夜進剿寶山李能通率眾先進劉長佑隨後策應寶山之賊先嚴陣以待李能通匹馬突



陣各勇鼓譟從之賊遽敗退我軍并力窮追至離新喻縣城里許之大頭山賊悉據山巔義勇衝擊賊猶拚死抗拒候選知縣劉坤一麾眾繞向山後賊勢不支乃敗入城中義勇逐之而入賊遂出東門楚勇在城外邀擊賊渡河欲斷浮橋我軍一擁登橋賊於對岸開放槍礮正在相持義勇從下游渡河賊首尾受敵始狂奔四竄追殺百餘名生擒五名此劉長佑一軍克復新喻縣城之實在情形也又據知府銜卽選同知趙煥聯稟報奉湖南撫臣札飭會商酃縣各軍先攻永甯十二月初九日派左右兩營進扼永新之橋頭初十日趙煥聯督中營越山而進永甯外委呂宗標蓮花廳照磨沈鶴鳴隨帶兵勇助剿探知甯新

交界之泥湖坳有逆黨設伏守隘十一日且探且進該逆聞風遁去未刻行抵渡陂營壘未定礮頭賊目何逆因乘我軍疲乏掩旗息鼓分三路來犯趙煥聯分三路擊之中路之賊先敗左右同時奔潰殲斃四十餘名次日黎明派隊往擊賊竄入亂山中尾殺十餘人十三日行抵縣城我軍甫入南門偵知賊伏城外五里之蕉碧村趙煥聯率眾奮擊大破之殺賊目二名餘匪三百餘名生擒僞協理王起盛等此趙煥聯一軍克復永甯縣城之實在情形也據各營稟報前來臣等伏查咸豐五年冬閒瑞臨袁州相繼失陷西路州縣多淪於賊自去秋援軍來瑞而兩湖之路始通自袁州克復鄂師抵潯而西路各屬以次恢復

目下南昌八屬袁州四屬一律肅清南康四屬已復其三臨江  
瑞州吉安九江四府亦各克復二屬四屬不等臣等仍當激勵  
諸將規復府城俟西路局勢大轉卽當分兵東路埽盪羣醜以  
期仰慰

宸廑其武甯縣一案可否容臣等酌保數人伏候

訓示遵行所有官軍兩克建昌一復武甯及湖北官軍收復瑞  
昌德安湖南援師克復新喻永甯等縣城各緣由理合恭摺彙  
奏伏乞

皇上聖鑒訓示施行謹

奏





目疾請假摺 咸豐七年正月十七日

奏爲 微臣 現患目疾懇

恩賞假一月在營醫調恭摺奏祈

聖鑒事竊 臣 於上年十二月初一日馳赴吳城九江各軍營業

經附奏在案旋於二十八日回省疊接稟報南岸李續賓之師

於三十日與城賊援賊接仗大勝北岸續到之副將鮑超管帶

三千六百人於初五日接仗獲勝蹋毀小池口賊壘二座目下

九江南北兩岸水陸馬步至二萬餘人之多聲勢浩大事務繁

多 臣 卽日擬由瑞州前往九江料理一切庶可與湖北安徽聯

絡一氣惟現患目疾竟日不能開視合無籲懇

天恩賞假一月卽在瑞州九江軍營靜心調養恭候

訓示除九江各戰情形另行會摺詳報外理合附驛具奏伏乞

皇上聖鑒謹

奏



報丁父憂摺 咸豐七年二月十六日

奏為 微臣 現丁父憂恭摺馳報仰祈

聖鑒事竊 臣 於正月十七日自省河拜摺後即馳至奉新督帶

候補知府吳坤修一軍同赴瑞州四面合圍開掘長濠斷賊接

濟二月初四日回省一次與西安將軍 臣 福興巡撫 臣 文俊晤

商大局初九日仍來瑞州十一日接到家信 臣 父

誥封光祿大夫曾麟書於二月初四日病故 臣 係屬長子例應

開缺丁憂溯查 臣 自咸豐二年奉

命典試江西奏蒙

恩准假歸省親行至太湖縣聞訃丁母憂即由九江奔喪回籍

甫經百日奉

旨飭辦團練時值武昌失守數省震動臣出而襄事摺內聲明俟大局稍轉卽當回籍終制具奏在案咸豐三年冬閒疊奉撥鄂援皖肅清江面之

命四年八月摺內聲明臣係丁憂人員如稍立戰績無論何項

褒榮何項議敘微臣概不敢受辦理稍有起色卽當奏明回籍

補行心喪等因具奏亦在案五年九月蒙

恩補授兵部右侍郎維時雖已服闋而臣之私心常以未得在

家守制爲隱憾今又遽丁父憂計微臣服官二十年未得一日

侍養親闈前此母喪未能妥辦葬事今茲父喪未能躬視含殮

而軍營數載又過多而功寡在

國爲一毫無補之人在家有百身莫贖之罪椎胸自責抱痛何

極瑞州去臣家不過十日程途卽日遵

制丁憂奔喪回籍一面由驛馳奏恭候

諭旨臣之胞弟曾國華出繼叔父爲嗣現在瑞州軍營卽日交

卸回里丁本生降服憂胞弟曾國荃現在吉安軍營亦應奔喪

回籍惟撫建大股賊匪二萬餘人赴援吉安連日與官軍大戰

雖屢獲勝仗而我軍亦有傷亡國荃之能否遄歸尙未可知伏

查微臣經手事件以水師爲一大端署提督楊載福駐紮九江

所統外江水師十五營道員彭玉麟駐紮吳城所統內湖水師



奏稿卷十一  
八營合計船隻五百餘號礮位至二千餘尊之多此非臣一人

所能爲力臣在衡州時僅奏明造船百六十號岳州以下雖陸

續增添而九江敗挫之後則水師中衰其時回援湖北者僅船

百餘號賴彭玉麟力支危局胡林翼楊載福重廓規模而又有

廣東督臣購運洋礮湖南撫臣督率官紳廣置船隻子藥於是

外江之水師始振陷入鄱湖者亦僅船百餘號賴江西撫臣及

總局司道竭力維持增修船礮籌備子藥於是內湖之水師亦

振合四省之物力各督撫之經營楊載福等數年之戰功乃克

成此一枝水軍臣不過因人成事豈敢無其實而居其名惟臣

因事離營內外水軍或分歧而不定相應奏明請

旨特派署提督臣楊載福總統外江內湖水師事務惠潮嘉道

彭玉麟協理外江內湖水師事務庶幾號令歸一名實相符楊

載福戰功最偉才識遠勝於臣彭玉麟備歷險艱有烈士之風

伏乞

聖恩時加訓勵該二人必能了肅清江面之局仍請

旨飭下湖北撫臣胡林翼月籌銀三萬兩江西撫臣文俊月籌

銀二萬兩解交楊載福彭玉麟水營俾此軍不以饑疲致潰則

不特爲攻剿九江湖口所必需卽將來圍攻金陵巡防長江亦

必多所裨益此臣經手事件之大端也自水師而外惟湘勇係

同縣之人寶勇係久從之卒於臣略有關係現在李續賓之湘

勇駐紮九江精勁樸實隱然巨鎮久在

聖明洞鑒之中劉騰鴻之湘勇普承堯之寶勇駐紮瑞州嚴明

勤謹足當大敵但使餉項稍敷必能樹立功績臣在軍中亦無

所益卽不在軍中亦無所損此外江西水陸諸軍及各省援師

自去歲以來皆由撫臣文俊與臣會商調遣今臣丁憂開缺應

由西安將軍福興與撫臣會商辦理近日洪楊內亂武漢肅清

袁州奉新等處克復數城江西局勢似有旋轉之機惟臣猝遭

父喪苦塊昏迷不復能料理營務合無籲懇

天恩准臣在籍守制稍盡人子之心而廣

教孝之典全家感戴



皇仁實無既極抑或

賞假數月仍赴軍營効力之處聽候

諭旨遵行現在函商將軍福興巡撫文俊兩

臣

酌請一人前來

瑞州撫循各營將士

臣

拜摺後卽由瑞州奔喪回里除俟抵家

後再行呈報外所有

微臣

丁憂開缺緣由理合由驛六百里馳

奏伏乞

皇上聖鑒訓示施行謹

奏

Blank manuscript page with vertical columns.

呈請代奏奔喪到籍日期摺 咸豐七年二月三十日

爲呈請據情代奏仰祈

聖鑒事竊 國藩在瑞州營次聞訃丁憂奔喪回籍業於二月十

六日由驛馳奏在案嗣經西安將軍福興江西巡撫文俊派令

督糧道李桓於二十日來至瑞州軍營聯絡將領拊循士卒 國

藩將一切軍情面爲述告布政司銜李續賓亦令其胞弟李續

宜由九江馳至瑞州幫同照料營務瑞州開挖長濠三十一里

於正月二十五日興工晝夜催趲二月十八日完竣賊之接濟

文報均已斷絕諒無他虞 國藩卽於二十一日匍匐起行二十

五入湖南境二十九日抵家所有奔喪到籍日期理合呈請據



情代奏伏乞

皇上聖鑒謹呈

臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...  
 臣等謹將... 奏稿... 伏乞... 皇上... 聖鑒... 謹呈...

呈請外奏...

二八二

呈請代奏謝 恩摺

咸豐七年三月二十六日

爲呈請據情代奏恭謝

天恩仰祈

聖鑒事本年三月十一日准湖南巡撫咨開咸豐七年二月二十七日內閣奉

上諭駱秉章奏統兵大員現丁父憂一摺兵部侍郎曾國藩之父曾麟書在籍病故該侍郎現在江西督師軍務正當喫緊古人墨經從戎原可奪情不令回籍惟念該侍郎素性拘謹前因母喪未終授以官職具摺力辭今丁父憂若不令其奔喪回籍非所以遂其孝思曾國藩著賞假三箇月回籍治喪并賞銀四

百兩由湖南藩庫給發俾經理喪事俟假滿後再赴江西督辦  
軍務以示體恤欽此跪聆之下感泣難名當卽宣讀

諭旨祭告先靈恭設香案率領闔家大小望

闕叩頭竊

國藩

才識庸劣軍旅未嫻數載從戎過多功寡覩烽

煙之未靖愧調度之無方茲又遽遭大故解職離營方憂懼之  
交深欲陳情而悚息迺蒙

皇上天恩賞假三月回籍治喪并

賞銀兩經理喪事凡臣子難言之隱早在

聖明體諒之中不匱之思

錫類罔遺於一物非常之典



殊恩下賁於九泉

國藩

惟有殫竭愚忱勉圖報稱戰戰兢兢常

懷履薄臨深之義子子孫孫永矢銜環結草之忱所有

國藩感

激下忱理合率同諸弟呈請據情代奏叩謝

天恩伏乞

皇上聖鑒謹呈

Blank manuscript page with vertical columns.

瀝陳下情懇請終制摺

咸豐七年五月二十二日

奏爲瀝陳下情懇請終制仰祈

聖鑒事咸豐七年二月二十七日奉

上諭駱秉章奏統兵大員現丁父憂一摺兵部侍郎曾國藩之父曾麟書在籍病故該侍郎現在江西督師軍務正當喫緊古人墨經從戎原可奪情不令回籍惟念該侍郎素性拘謹前因母喪未終授以官職具摺力辭今丁父憂若不令其奔喪回籍非所以遂其孝思曾國藩著賞假三箇月回籍治喪并賞銀四百兩由湖南藩庫給發俾經理喪事俟假滿後再赴江西督辦軍務以示體卹欽此三月初一日奉



上諭曾國藩奏丁憂回籍請派員督辦軍務一摺曾國藩丁父  
憂前據駱秉章奏到業經降旨賞假三箇月回籍治喪假滿後  
著仍遵前旨卽赴江西督辦軍務以資統率等因欽此仰見我  
皇上深仁渥澤旣俯鑒臣子之隱曲示矜憐復不棄驚下之材  
曲加器使凡屬旁觀猶爲感泣矧在身受能無奮興惟微臣下  
情有不敢不瀝陳於

聖主之前者臣通籍時祖父母父母皆無恙在京十四年在軍  
五年堂上四人先後見背生前未伸一日之養沒後又不克守  
三年之制寸心愧負實爲難安前代及我

朝奪情之案被人彈劾者層見疊出而兩次奪情則從古所無

臣到籍以來輾轉思維欲終制則無以報吾

君高厚生成之德欲奪情則無以報吾親恩勤鞠育之懷欲再出從軍則無以謝後世之清議欲不出則無以謝患難相從之軍士進退狼狽不知所裁伏查近日軍務我

皇上不動聲色芟夷大難潛移默運實已挽回十分之七八以大局言之河北蕩平洪楊內亂武漢肅清水師精勁迥非咸豐二三年氣象可比以江西言之西路克復十餘州縣潯瑞吉臨皆駐重兵亦迥非上年春夏情形可比自臣出營而後又聞瑞州長濠日固臨江四面合圍吉安賊船焚燬一空東路貴溪屢獲大捷江西軍事漸有起色得將軍巡撫兩臣辦理裕如添臣

一人未必有益少臣一人不見其損臣恭閱邸鈔上年大學士

賈楨丁憂

皇上賞假六箇月令其回籍治喪旋因賈楨奏請終制又蒙

諭旨允其所請并指明御史鄒焄杰傳聞之誤臣假期將滿葬

事未畢合無籲懇

天恩援照賈楨之例准臣在籍終制感激

鴻慈永無既極微臣報

國心長治軍才短守制之日有限事

君之日無窮瞻望

北闕惶恐待



命所有漑陳下情懇請終制緣由恭摺由驛五百里馳奏伏乞  
皇上聖鑒訓示遵行謹

奏



恭謝 天恩并籲請開缺摺 咸豐七年六月初六日

奏爲恭謝

天恩仍籲請開缺恭摺仰祈

聖鑒事咸豐七年閏五月十七日兵部火票遞到閏五月初五日內閣奉

上諭曾國藩奏瀝情懇請終制一摺曾國藩在江西軍營聞丁父憂前經降旨賞假三箇月回籍治喪俟假滿時再赴江西督辦軍務以示體卹茲據該侍郎奏稱假期將滿葬事未畢籲准在籍終制曾國藩本以母憂守制在籍奉諭幫辦團練當賊氛肆擾皖鄂卽能統帶湖南船勇墨經從戎數載以來戰功懋著



忠誠耿耿朝野皆知伊父曾麟書因聞水師偶挫又令伊子曾國華帶勇遠來援應尤屬一門忠義朕心實深嘉尙今該侍郎以假期將滿陳請終制并援上年賈楨奏請終制蒙允之例覽其情詞懇切原屬人子不得已之苦心惟現在江西軍務未竣該侍郎所帶楚軍素聽指揮當茲剿賊喫緊亟應假滿回營力圖報効曾國藩身膺督兵重任更非賈楨可比著仍遵前旨假滿後卽赴江西督辦軍務并署理兵部侍郎以資統率俟九江克復江西肅清朕必賞假令其回籍營葬俾得忠孝兩全毫無餘憾該侍郎殫心事卽以善承伊父教忠報國之誠當爲天下後世所共諒也欽此

微臣

自顧何人膺茲

寵獎非分之榮惶悚無地臣父畎畝效忠既蒙

頒賜賻銀復荷

溫語褒嘉當卽焚香祭告宣讀

諭旨合家跪聆感激零涕伏念臣材識駑下本乏寸長而事會

所乘復多乖舛自咸豐三年初奉援鄂援皖之

命維時吳文鎔總督鄂中係臣之座師江忠源巡撫皖省係臣

所保舉公義私情望援孔切書牘催促皆相勸以忠義期共濟

於艱危不圖臣甫出師而吳文鎔江忠源相繼殉難臣亦旋有

岳州之敗靖江之挫厥後憑仗

天威水陸東征岳鄂蕪黃長驅席卷謂可成破竹之勢不圖舟

師挫於湖口陸兵潰於北岸遂有武昌再陷之變五年秋間九  
江南康水陸安穩又分湘勇回援湖北軍勢尙沛然而有餘不  
圖塔齊布羅澤南相繼淪謝兩路悍賊適於其時竄入江西腹  
地局勢爲之大震聲威亦爲驟減六年困守江西備極艱險冬  
春之間西路克復十餘州縣漸有轉機臣進駐瑞州開掘長濠  
甫經合圍不圖又有聞訃丁憂之耗材智本極庸愚事機復多  
不順臣獨居深念常恐福分淺薄終不能立功以報

聖明於萬一所爲闇白傷感者也計湖南一軍有功可言者往  
年則陸路塔羅水路楊彭久立聲績近年則李續賓力振湘軍  
而劉騰鴻李元度亦有撐持堅忍之力微臣因人成事毫無功



效屢經具奏在案

諭旨戰功懋著之褒讀之惶悚流汗在

聖主善善從長或姑爲過情之譽以試將來在

微臣

循名責實

又何敢掠人之美以爲已有至楚軍素聽指揮一節查湖南練  
勇昔年猶有見賊逃遁懷鄉思歸之事近則閱歷極久膽氣皆  
壯輕賊匪之伎倆慕

天家之官爵以投營爲名利兩全之場以戰陣爲日用常行之  
務湘中勇夫赴江西湖北投效者絡繹不絕父缺子代此往彼  
歸較之臣初募練之時風氣迥不相同但使稍給口食即可靜  
聽指揮臣二月聞訃之初亦慮將士相從日久恐難驟離而他

屬自出營而後各路安謐如常吉安臨江屢獲勝仗將軍福興  
至瑞州視師一次巡撫耆齡遣員至瑞州犒賞一次各營皆歡  
欣踴躍樂爲用命可見士無常親惟撫馭者是親不必楚人而  
後能用楚眾也我

皇上器使庸材嘉矜并至於有過宜罰之時曲賜

恕原於無善可錄之中曲加

獎借既荷

溫語寵荅復蒙

飭署兵部侍郎以資統率

臣

伏念丁憂人員未開實缺寸心終

抱不安衰絰從事明臣黃道周目爲凶醜不祥之人況

臣

兩遭

親喪自度不祥之身決非宏濟時艱挽回大局之象合無籲懇

天恩俯准開除兵部侍郎缺感激

皇仁實無既極除將

微臣

辦事艱難情形同日另奏外所有恭

謝

天恩并籲請開缺緣由恭摺由驛五百里馳奏伏乞

皇上聖鑒訓示施行謹

奏





漚陳辦事艱難仍懇終制摺 咸豐七年六月初六日

奏為漚陳微臣辦事艱難竭蹶終恐貽誤籲懇在籍守制恭摺

奏祈

聖鑒事竊臣謬廁戎行與聞軍事仰蒙

聖慈垂注

疇載恩深凡有奏請多蒙

俞允卽有過失常荷

宥原遭逢

聖明得行其志較之古來疆場之臣掣肘萬端者何止霄壤之別惟以臣之愚處臣之位歷年所值之時勢亦殊有艱難情狀

奏稿卷一  
無以自申者不得不略陳於

聖主之前定例軍營出缺先儘在軍人員拔補給予割付臣處

一軍概係募勇不特參游都守以上無缺可補卽千把外委亦終不能得缺武弁相從數年雖保舉至二三品而充哨長者仍領哨長額餉充隊目者仍領隊目額餉一日告假卽時開除終不得照綠營廉俸之例長遠支領弁勇互生猜疑徒有保舉之名永無履任之實或與巡撫提督共事一方隸人衙門則挑補實缺隸臣麾下則長生缺望臣未奉有統兵之

旨歷年在外不敢奏調滿漢各營官兵實缺之將領太少大小不足以相維權位不足以相轄去年會籌江西軍務偶欲補一



千把之缺必婉商巡撫請其酌補其隸九江鎮標者猶須商之  
總兵令其給予劄付雖居兵部堂官之位而事權反不如提鎮  
此辦事艱難之一端也

國家定制各省文武黜陟之權責成督撫相沿日久積威有漸  
督撫之喜怒州縣之榮辱進退繫焉州縣之敬畏督撫蓋出於  
勢之不得已其奉承意旨常探乎心之所未言臣辦理軍務處

處與地方官相交涉文武僚屬大率視臣爲客視本管上司爲

主賓主旣已歧視呼應斷難靈通防剿之事不必盡謀之地方  
官矣至如籌餉之事如地丁漕折勸捐抽釐何一不經由州縣  
之手或臣營抽釐之處而州縣故爲阻撓或臣營已捐之戶而

州縣另行逼勒欲聽之則深慮事勢之窒礙欲懲之則恐與大吏相齟齬錢漕一事小民平日本以浮收爲苦近年又處積困之餘自甲寅冬閒兩路悍賊竄入江西所在劫掠民不聊生今欲於未經克復之州縣徵收錢漕勸諭捐輸則必有勁旅屯駐以庇民之室家而又或擇良吏以恤民隱或廣學額以振士氣或永減向日之浮收或奏豁一年之正課使民感惠於前倖澤於後庶幾屢捐而不怨竭脂膏奉公上而不以爲苦然此數者皆巡撫之專政臣身爲客官職在軍旅於勸捐擾民之事則職分所得爲於吏治學額減漕豁免諸務則不敢越俎代謀縱欲出一愷惻詳明之告示以儆官邪而慰民望而身非地方大吏

州縣未必奉行百姓亦終難見信此辦事艱難之一端也臣幫辦團練之始仿照通例鐫刻木質關防其文曰

欽命幫辦團防查匪事務前任禮部右侍郎之關防咸豐四年八月臣剿賊出境湖南撫臣咨送木印一顆其文曰

欽命辦理軍務前任禮部侍郎關防九江敗後五年正月換刻

欽差兵部侍郎銜前禮部侍郎關防是年秋閒補缺又換刻

欽差兵部右侍郎之關防臣前後所奉援鄂援皖籌備船礮肅

清江面諸

諭皆係接奉

廷寄未經明降



諭旨外閒時有譏議或謂臣係自請出征不應支領官餉或謂

臣未奉

明詔不應稱

欽差字樣或謂

臣

曾經革職不應專摺奏事

臣

低首茹歎但求

集事雖被侮辱而不辭迄今歲月太久關防之更換太多往往

疑爲偽造釀成事端如李成謀戰功卓著已保至參將矣被刑

辱於芷江縣出示以

臣

印札而不見信周鳳山備歷艱辛已保

至副將矣被羈押於長汀縣亦出示以

臣

印札而不見信前福

建巡撫呂佺孫曾專函馳詢

臣

印不符之故甚至捐生領

臣

處

之實收每爲州縣猜疑加之鞠訊或以爲不足據而勒令續捐

今若再赴軍營又須另刻關防歧舛愈多憑信愈難臣駐紮之  
省營次無定閒有部頒緊要之件亦不徑交臣營四年所請部  
照因久稽而重請六年所請實官執照至今尙無交到確耗此  
外文員之憑武官之劄皆由督撫轉交臣營常遲久而不到軍  
中之事貴取信如金石迅速如風霆而臣則勢有所不能斯又  
辦事艱難之一端也茲三者其端甚微關係甚鉅臣細察今日  
局勢非位任巡撫有察吏之權者決不能以治軍縱能治軍決  
不能兼及籌餉臣處客寄虛懸之位又無圓通濟變之才恐終  
不免於貽誤大局凡有領軍之責者軍覆則死之有守城之責  
者城破則死之此天地之常經古今之通義微臣講求頗熟不

敢踰閑今楚軍斷無覆敗之患省城亦無意外之虞臣赴江西  
無所容其規避特以所陳三端艱難情形既如此而奪情兩次  
得罪名教又如彼斯則宛轉縈思不得不泣陳於

聖主之前者也

臣

冒昧之見如果賊勢猖狂江西危迫

臣

當專

摺馳奏請赴軍營以明不敢避難之義若猶是目下平安之狀  
則由將軍巡撫會辦事權較專提挈較捷臣仍籲懇

天恩在籍終制多守數月盡數月之心多守一年盡一年之心  
出自

聖主逾格鴻慈不勝惶恐待

命之至所有瀝陳辦事艱難仍籲懇終制緣由恭摺馳奏伏乞



皇上聖鑒訓示施行謹  
奏



欽奉兩次

諭旨覆奏摺

咸豐七年九月初九日

奏爲欽奉兩次

諭旨恭摺覆奏仰祈

聖鑒事七月初一日准兵部火票遞到六月十九日奉

上諭前因曾國藩以假期將滿籲懇終制當經諭令假滿後卽

赴江西督辦軍務并署理兵部侍郎以資統率原因該侍郎督

剿有年楚軍正資調度墨經從戎忠孝兩盡茲據奏稱江西各

營安謐如常毋庸親往撫馭并瀝陳才難宏濟心抱不安仍請

開缺守制各等語曾國藩以督兵大員正當江西喫緊之際原

不應遽請息肩惟據一再陳請情詞懇切朕素知該侍郎并非



畏難苟安之人著照所請准其先開兵部侍郎之缺暫行在籍  
守制江西如有緩急卽行前赴軍營以資督率此外各路軍營  
設有需才之處經朕特旨派出該侍郎不得再行瀆請致辜委  
任欽此九月初三日准湖南巡撫咨稱八月十四日奉

上諭在籍侍郎曾國藩前經降旨准其暫行在籍守制倘江西  
軍務緊急或他省有需人之處仍著候旨前往昨據給事中李  
鶴年奏曾國藩自丁父憂屢蒙賜金給假褒獎慰畱此後墨經  
從戎宜爲天下所共諒豈容以終制爲守經再三瀆請請飭仍  
赴江西及時圖報等語軍務奪情原屬不得已之舉朕非必欲  
該侍郎卽入仕途然如該給事中所奏亦可見移孝作忠經權

并用公論自在人心現在江西軍務有楊載福統帶雖無須曾國藩前往而湖南本籍逼近黔粵賊氛未息團練籌防均關緊要該侍郎負一鄉重望自當極力圖維急思報稱所有李鶴年原摺著鈔給閱看將此諭知駱秉章著傳旨諭令曾國藩知之欽此

臣

初奉暫准守制之

旨因軍勢未定恐有

後命是以未及遽行覆奏自七月以來聞龍泉克復吉安挫失之信又聞克復瑞州府城進賢縣城之信頃又聞九江一軍攻克黃梅縣及小池口之信仰託

聖主威福江西軍務辦理得手

批諭飭令緩急赴營之處揆度時勢自可毋庸前往茲復欽奉  
諭旨飭臣在湖南本籍辦理團防力圖報稱

聖主使臣以禮因時制宜跪聆之下感悚曷勝目下湖南全省  
肅清臣當仍遵

前旨暫行守制如果賊氛不靖湖南告警所有應須團練籌防  
之處屆時商之湖南撫臣再行奏明辦理臣自到籍以來日夕  
惶悚不安自問本非有爲之才所處又非得爲之地欲守制則  
無以報

九重之鴻恩欲奪情則無以謝萬世之清議惟盼各路軍事日  
有起色仰紓



宵旰之憂卽微臣恪守禮廬寸心亦得以稍安所有奉到兩次

諭旨恭摺由驛三百里覆奏伏乞

皇上聖鑒訓示施行謹

奏

硃批江西軍務漸有起色卽楚南亦就肅清汝可暫守禮廬仍  
應候旨大臣出處以國事爲重抒忠卽爲全孝所云懼清議之  
訾猶覺過於拘執也欽此

[The main body of the page contains multiple vertical columns of text, which are extremely faint and illegible due to the image quality.]

酌擬報銷大概規模摺

咸豐七年十二月初七日

奏爲酌擬報銷大概規模請

旨飭部核議恭摺奏祈

聖鑒事竊

臣

處一軍未經奏派大員總理糧台亦無專司之員

始終其事初在衡州造船募勇冒昧從事條理未精厥後越境

剿賊用銀漸多歷時漸久所募概係勇丁將領多係紳士官事

非其所嫻冊報閒有未備而又與湖南湖北江西三省總局相

交涉有先在

臣

處糧台領餉而後在他處支領者有本在

臣處

領餉而他處亦時爲接濟者又有由江援鄂由鄂援江忽分忽

合中間并無餉可領者

臣

處辦理報銷比他軍尤覺散漫難清



臣之愚見擬將統轄較多者分爲數大款將<sub>臣</sub>處領餉之月日及他處領餉之月日先行具奏俾眉目清楚起訖分明庶免輻輳混淆之弊亦無重複開報之虞如塔齊布所統爲一款該提督所帶道勇寶勇等於咸豐四年二月在<sub>臣</sub>處糧台支餉其所帶撫標等兵仍在湖南省局支餉在通城湘潭岳州皆係如此辦理四年閏七月初二日岳州賊退塔齊布出境追剿其所帶全軍應自閏七月初三日起至五年七月二十日止概由<sub>臣</sub>處糧台報銷二十一以後卽歸入周鳳山款下接算羅澤南所統爲一款該員所帶湘勇自咸豐二年臘月隨<sub>臣</sub>同赴長沙嗣後年餘均在省局領餉自四年閏七月初三日起直至五年十一

月二十八日由江西抵湖北洪山之日止應歸臣處糧台報銷  
其二十九日以後卽應歸湖北總局報銷楊載福所統水軍爲  
一款該鎮自咸豐三年十一月衡州造船起至五年正月初五  
日止應歸臣處糧台報銷其因病離營後再出統帶水師則由  
湖北湖南報銷彭玉麟所統爲一款該員自三年十一月衡州  
造船起至五年正月由九江赴援湖北尙在臣轉運局支餉擬  
截至四月三十日止歸臣處報銷五月初一日以後則歸湖北  
總局報銷是冬調赴江西自十二月起至六年臘底止仍歸臣  
處報銷七年正月以後則歸江西總局報銷李孟羣所統爲一  
款該司經臣咨調由廣西來楚自四年六月初八到長沙之日

起至五年正月初三由九江赴援湖北之日止應歸臣處糧台  
報銷此後則歸湖北報銷李元度所統為一款該員自五年正  
月在南昌募勇起至六年臘月三十日止應歸臣處糧台報銷  
七年以後則歸江西省局報銷周鳳山所統為一款該將自咸  
豐三年九月剿辦常甯道州土匪即在臣處支餉自四年二月  
至五年七月應併入塔齊布款下核算自七月廿一日接統潯  
營全軍起至六年九月止應歸臣處糧台報銷其再由長沙募  
勇援剿吉安則歸湖南江西報銷以上七款皆為日較久用銀  
較多交涉各省宜分別界限者也此外水陸兩軍營數尚多或  
先分後併或因敗撤遣與各省并無交涉者將來彙冊報部不



必先行瑣陳又如李續賓蔣益澧前在臣軍年餘擬卽併入羅澤南款下核算厥後該員等各統一軍則歸湖北等省報銷又如臣弟曾國華曾國荃或自武昌赴援瑞州或自長沙赴援吉安在臣處領餉甚少應歸江西等省報銷凡此皆出款之大概規模也至若經手人員臣在衡州時出入銀錢多係自行經理委員卽補同知陶壽玉檢點帳目四年二月至長沙委員候補知府李瀚章管理收支事件七月由岳州赴鄂於長沙設立後路糧台派湖南卽用道裕麟湖北記名道厲雲官司其事其水路行營收支事務則李瀚章及江南同知鄭德基主之九月以後於漢口設立轉運局派禮部員外郎胡大任司其事五年駐

軍南康於南昌設立後路糧台派禮部員外郎甘晉及李瀚章  
司其事六年十二月撤毀糧台自七年正月起歸併江西省局  
司道辦理除鄭德基業經病故外其裕麟厲雲官胡大任甘晉  
李瀚章陶壽玉六員現在分處兩湖江西安徽四省俟江西軍  
務將畢卽行設局飭該六員爲臣辦理報銷事件遵照定式造  
冊送部大約水陸數年之餉精礮船各廠之經費通共用銀在  
三百萬兩內外勾稽尙易完竣惟是該六員者并非總理本無  
專責自始至終皆係窮窘之境勸捐挪墊委曲維持或因敗挫  
遊散奔走於危地或因空乏屢展受侮於弁兵廉謹將事艱苦  
備嘗而九江一敗又有燒劫餉船遺失文卷之事將來如有款

目不符著賠追繳之處皆係臣一身承認不與該六員相干是  
否有當謹擬大概規模請

旨飭下該部核議施行理合具摺送交江西撫臣附奏伏乞  
皇上聖鑒訓示施行謹

奏





曾文正公奏稿

卷之十二目錄

恭報起程日期摺

咸豐八年六月十七日

湖口建昭忠祠九江建塔齊布祠摺

八月十二日

湘鄉縣建忠義祠摺

全日

廣豐玉山兩縣解圍摺

全日

遵旨移師援閩摺

全日

攻克安仁縣城摺

八月二十四日

移師由杉關入閩摺

九月十三日

調派官軍分道入閩摺

十月十六日

移軍勦景德鎮股匪摺

十一月二十六日

遵旨斟酌具奏摺

十二月十一日

通籌全局請添練馬隊摺

咸豐九年正月十一日

李續賓死事甚烈功績最多摺

全日

曾國華殉難三河鎮摺

全日

謝曾國華追贈優卹

恩摺

全日

蕭啟江在南康勝仗摺

全日

張運蘭攻勦景德鎮情形摺

全日



恭報起程日期摺

咸豐八年六月十七日

奏爲恭報起程日期仰祈

聖鑒事竊

臣於六月初三日准湖南巡撫咨稱承准軍機大臣

字寄五月二十一日內閣奉

上諭前因江西賊匪竄入浙江之常山開化圍逼衢州府城疊

由江南徽州等處調撥援師馳往救援恐官軍無所統屬特加

漳州鎮總兵周天受提督銜督辦浙江防剿事宜嗣因處州失

守并攻陷金華所屬之永康武義二縣恐周天受資望較淺未

能統率眾軍復諭和春前往督辦茲據和春奏現在患病未痊

刻難就道東南大局攸關必須聲威素著之大員督率各軍方

能措置裕如曾國藩開缺回籍計將服闋現在江西撫建均經克復止餘吉安一府有曾國荃劉騰鶴等兵勇足敷勦辦前諭耆齡飭令蕭啟江張運蘭王開化等馳援浙江該員等皆係曾國藩舊部所帶勇丁得曾國藩調遣可期得力本日已明降諭旨令曾國藩馳驛前往浙江辦理軍務著駱秉章卽傳旨令該侍郎迅赴江西督率蕭啟江等星馳赴援浙境與周天受等各軍力圖掃蕩該侍郎前此墨經從戎不辭勞瘁朕所深悉現當浙省軍務喫緊之時諒能仰體朕意毋負委任何日起程并著迅速奏聞以慰廑念將此由六百里各諭令知之欽此伏念浙江完富之區關係東南大局賊勢方張亟應迅籌援勦遵卽於

初七日自家起程十二日抵長沙與撫臣駱秉章會商并一面

飛飭蕭啟江張運蘭王開化等由撫建拔營進駐鉛山縣之河

口鎮臣擬由水路至九江登陸遄抵河口大營即便督率星馳

赴浙蓋由湖南江西陸路赴浙與假道長沙程途遠近相同而

夏令南風順水舟行較速且臣軍後路餉需轉運一切亦須與

湖北督撫臣面相商權庶期無悞臣師行臣才質凡陋頻年飽歷

憂虞待罪行間過多功寡伏蒙

皇上鴻慈曲加矜宥惟有殫竭愚忱慎勉襄事以求稍紓

宵旰憂勤所有軍務一切俟行抵河口後再行詳悉陳奏理合

將微臣起程日期恭摺由驛覆奏伏乞



皇上聖鑒訓示施行謹

奏

硃批汝此次奉命卽行足徵關心大局忠勇可尙俟抵營後迅將如何布署進剿機宜由驛馳奏可也欽此

湖口建昭忠祠九江建塔齊布祠摺咸豐八年八月十二日

奏為湖口建立水師昭忠祠九江建立前提臣塔齊布祠請

旨敕部核議恭摺奏

聞仰祈

聖鑒事竊臣國藩於咸豐三年在衡州製造戰船設立水師四

年越境剿賊自湘潭以至九江焚燒賊艦萬餘事機甚順旋以

湖口之挫戰船半入內湖半阻外江其在外江者由彭玉麟帶

領回援武昌復經湖南撫臣製造船礮交臣楊載福募勇會同

援鄂苦戰兩年再克武漢湖北撫臣胡林翼經營恢廓外江水

師遂增至一十八營其在內湖者初僅戰船百零七號臣國藩

入南昌後會同江西撫臣添置船礮札調彭玉麟來江統帶內

湖水師亦增至二百餘舟七年二月臣國藩丁憂回籍請

旨特派臣載福總統外江內湖水師事務彭玉麟協理仰蒙

聖恩允准九月內會同規取湖口彭玉麟攻其內臣楊載福攻

其外臣李續賓亦以陸師從山後抄擊立將湖口克復自是而

逆舟之精銳略盡九江之賊勢益孤矣仰荷

聖主威福合三省之物力成此一枝水師上下三千里舳舻不

絕旌旗相望臣楊載福復進剿蕪湖一次肅清

江面之局大致麤定惟是數年以來弁勇出入於礮子如雨之

中挺身殉難鬱爲國殤合計陣亡傷亡不下三千餘人其有雖



死而冊名偶遺及大風覆舟而溺死失火藥箱而焚死者均不  
在此數中臣楊載福與彭玉麟會商就湖口石鍾山上建祠一  
所合祀水師陣亡各員弁勇丁名曰水師昭忠祠上以體  
聖主褒崇忠義之意下以動各營觀感奮發之心彭玉麟畱防  
湖口就近監修分別正祀附祀刊刻木主依次列入此湖口建  
立水師祠宇之原委也前提臣塔齊布署湖南撫標守備時已  
毅然有殺賊立功之志湘潭一役以千餘新集之師當數萬方  
張之賊楚軍之勇敢實倡於此大局之轉機亦始於此逮渥荷  
聖恩超擢提督涅臂刺字精忠報國轉戰岳州武昌大冶興國  
田家鎮廣濟黃梅等處身先士卒所向有功祇以九江一郡未



能速下忠憤填膺鬱憂成疾曰對孤城竟以身殉本年四月水陸諸軍克復九江該處士民及在營弁勇語及塔齊布當時遺憾無不感歎流涕異口同聲公請建立專祠並附祀陸師陣亡各員弁以報功而示勸已就郡城隙地擇期興工名曰塔忠武公祠臣李續賓委員監修其附祀之員弁勇丁確切查明刊刻木主依次列入此九江建立塔齊布祠宇之原委也臣國藩欽奉

諭旨馳赴浙江經歷九江湖口見兩處祠宇俱已將次工竣瞻拜爭趨往來相屬廣

盛世褒忠之典卜斯人向善之忱伏思

皇上眷念蓋臣

恩施逾格凡茲效命疆場之士悉本

朝廷鼓舞而成

臣等不揣冒昧籲懇

天恩敕下該部九江湖口兩祠宇照各府昭忠祠之例飭地方

官春秋致祭於

聖朝褒忠勸善之道或亦足以裨補於萬一謹會同湖廣總督

臣官文湖北巡撫

臣

胡林翼江西巡撫

臣

耆齡恭摺附驛具奏

伏乞

皇上聖鑒訓示施行謹

奏

小聖靈賜示訓符

天啓

旨文雖非滋補... 林... 西... 滋... 滋... 滋...

... 滋... 滋... 滋... 滋... 滋...

...

... 滋... 滋... 滋... 滋... 滋...

... 滋... 滋... 滋... 滋... 滋...

... 滋... 滋... 滋... 滋... 滋...

...

湘鄉縣建忠義祠摺

咸豐八年八月十二日

奏爲湘鄉縣城捐建忠義祠彙祀陣亡員弁勇丁恭摺奏

聞仰祈

聖鑒事竊

臣

國藩於咸豐二年十二月奉

旨幫辦湖南團防時長沙解圍未久撫

臣

張亮基札調湘勇千

人

臣

國藩率同羅澤南王鑫劉蓉羅信南數人督帶湘勇赴省

仿照前明戚繼光之法編束隊伍練習膽技當經縷晰奏明在

案三年二月衡山土匪曹戴李躍搆亂於草市派劉長佑王鑫

前往剿滅是爲湘勇殺賊立功之始五月十八日江西省城被

圍前安徽撫

臣

江忠源由九江入省登陴守禦飛書請援

臣國



藩會商湖南撫

臣

招募湘勇二千楚勇一千配以三廳兵八百

人赴江救援其監護軍行者則有夏廷樾郭嵩燾朱孫詒羅澤南其管帶湘勇之員則有謝邦翰易良幹羅信南康錦輝楊虎臣等而羅澤南亦自帶一營七月二十日軍至南昌二十四日因進兵太銳先勝後挫謝邦翰易良幹及羅信南之弟羅信東等同時陣亡此湘勇出境勦賊帶勇紳士力戰捐軀之始也臣續賓時在謝邦翰營中幫辦營務謝邦翰沒後遂接帶斯營臣國藩時在衡州聞援軍挫衄之信倡議於湘鄉建立祠宇祀謝邦翰易良幹及在江殉難之人此後如有死事員弁以次附祀名曰忠義祠四年冬間祠工告竣數載以來湘勇援鄂援江援

廣東援廣西幾無虛日今臣國藩復奉

命援勦閩浙臣續寶奉

命援勦皖豫統計湘勇之出境征伐者不下六七萬人員弁勇  
丁之陣亡傷亡者亦不下五千餘人其間死事最著者羅澤南  
靖節於武昌王鑫盡瘁於樂安劉騰鴻效命於瑞州羅澤南奉  
諭旨於三省建立專祠王鑫奉

旨於兩省建立專祠自應於本縣各建一祠劉騰鴻奉

旨於瑞州建立專祠亦應推廣

皇仁建祠本縣此外殉難各員如李杏春宣勞最久而勛名未  
彰鍾近衡死綏最先而卹典尙闕及其他營官幫辦哨弁死難

之人或慷慨以赴敵或力窮而就義均應彙入總祠上以體

聖世褒忠之意下以勵湘人觀感之誠本年六月臣國藩于役

浙省經過縣城周覽舊立祠宇規模狹小附祀之主無可安設

思欲稍加廓大行次黃州晤臣續賓商議意見相同臣等擬即

倡捐銀兩擇交邑紳就四年所修之祠添購基地重加修葺凡

陣亡將領弁勇分別正祀附祀刊刻木主依次列入合無籲懇

天恩敕下部議湘鄉縣所建忠義祠俯准照各府昭忠祠之例

飭地方官春秋致祭於

聖朝褒忠勵節之道或不無小補所有湘鄉縣捐建忠義祠

緣由謹會同湖南巡撫臣駱秉章恭摺附驛具奏伏乞

奏 皇上聖鑒訓示施行謹





廣豐玉山兩縣解圍摺

咸豐八年八月十二日

奏爲聞賊竄撲廣豐玉山兩縣官軍力戰守禦屢獲勝仗兩城先後解圍恭摺奏祈

聖鑒事竊浦城大股賊匪於七月初十日回竄廣豐縣五都地方平江營官守備彭大壽候選知縣夏宏江等與在城文武一面稟請援師一面分撥堵禦十一日黎明前隊長髮老賊數百名直犯縣城彭大壽等派三成隊出城迎擊賊稍卻退已刻復繞東門山背而來黃旗殷山喊聲震地數次猛撲猖獗異常彭大壽等以眾寡不敵飭各勇堅守勿動排列垛口以槍礮轟之待賊氣已疲突出不意出城奮擊賊遂大潰退三四里屯踞

未刻候選道李元度續派平江老左營都司銜守備童梅華新  
左營千總張詩華右營候選知縣郭式源馳來救援人心稍定  
十二日辰刻賊悉銳薄城我師仍堅忍相持未刻分三門出隊  
奮擊斃賊百餘名陣斬乘坐紅呢大轎賊渠二人我軍陣亡把  
總易金榜李傳綸二員十三四兩日逆賊愈集愈眾三面環攻  
並於東南兩門暨小北門外近城房屋加築牆壘另立堅卡圖  
開地道又於大北門高嶺時出大隊往來放鎗發喊十四日申  
刻彭大壽等商定左營出三百人排立北門嶺上以拒北路援  
賊右營前營湘勇營新左營各挑奮勇俱出小北門直撲賊壘  
賊列隊屋外鎗礮連施右營冒險衝入斃悍賊十餘人賊仍退

屋內堅拒我軍抄過屋背放火圍殺五六十人燒斃無數當將  
小北門外地道填塞時北路接應之賊擁至我左營之三百人  
者奮力攔截斃二十餘名賊始敗潰十五日黎明彭大壽等商  
定新左營及前營由大南門東門左右兩營由北門分門突出  
用劈山礮轟斃守卡之賊合力毀卡奪關擁入哨目彭學仕先  
鋒洪文杰及各勇目帶重傷者數名猶復鼓勇繼進賊遂不支  
當將南門外賊壘四座焚燒地道填塞乘勝追擊斃賊數百奪  
獲旗械無數隔河南岸之賊出援亦經潮勇擊退同時東門外  
之火已發殺斃燒斃之賊約二百餘名生擒九名賊遂向北逃  
奔左營帶隊尾追一二里餘賊奔過山背是夕二鼓後前營左



營新左營右營各出五成隊乘月色出城分八支前進放礮爲號齊隊向前破賊壘五座餘賊越嶺狂奔城圍立解探聞浦城後至股匪已至五都五鼓時復將守城之五成隊換出直抵毛家村拆毀浮橋沿河列隊拒之賊偵知有備折回北去不敢復窺廣豐此十一日至十六日廣豐縣城力戰解圍之實在情形也其竄玉山縣者十五日至十里塔前搭浮橋渡河候選道李元度率勇扼七里街口該逆三次衝突均經擊退斃賊數十名逼溺二十餘名我勇追過浮橋遇伏陣亡六人西刻賊忽分兩股從三里街河灘搶渡李元度回軍逆擊對河之賊卽從七里街擁進又分股直撲城下李元度恐城中有失乃帶隊入城登

陴守禦飛調老中營武威軍奇兵彰武等營陸續入城協守十六日辰刻賊圍西北兩門另股登南門塔上俯瞰城內我軍開礮指擊悍賊盡伏三里街民房牆內開挖地道距城僅三四丈十七日我軍趕挖西門濠溝該逆於牆中鑿洞轟礮擊斃我勇二人傷十九人李元度懸賞選募把總劉斗寅等百餘人直開西門援屋而上施放火箭噴筒破卡三處將賊踞各屋焚燬生擒五賊李元度在城上督戰被抬礮子打傷左目之下三分流血數升暈絕撲地半時始甦時城外之賊較官軍多至十餘倍環城掘洞鋤鋏之聲相聞城中米糧缺乏主將又復受傷人心驚惶其勢岌岌李元度傳藥甫畢裹創登城激厲將士安撫居

民飭各勇從城內自挖地洞出城後橫繞城根暗截賊之隧道  
又從小西門起至西北角止趕築月城五十餘丈高與城齊日  
夜竭力抵禦賊礮向城環擊各營轟害者十一人委員議敘八  
品職銜監生李家純中礮殞命百姓多被擊傷十八日賊出隊  
犯東門彰奇兵營官丁峻帶隊出擊各營派隊繼之奇兵哨官  
龔茂發陣斬偽總制胡先祥一名奪獲偽印偽官照及馬匹等  
件逆黨大敗歸巢又在西門四五丈外民房紮卡之處開挖地  
道仍穴牆開鎗使人莫敢近李元度復懸賞百金選募劉斗寅  
等開城緣屋而上將卡焚燬燒斃挖隧之賊數十人於土穴之  
中賊黨退數丈紮卡於北門外添營七座又從東門小港外搭



橋過渡希圖四面合圍二十日辰刻賊在東北城添大小營壘二座阻我常山來路各營派五成隊出擊丁峻帶彰奇營從東津橋包抄屈蟠黎獻丁應龍等從中路分進搶近賊營立將二壘踏毀追擊里許援賊大至漫山遍野不下二萬人丁峻等督隊相持迴合十餘次黎獻等另從北門橫衝賊陣刀矛相交哨官張應龍彭飛熊龔茂發龔拱綸等乘勝深入而賊來益眾龔茂發龔拱綸中礮陣亡張應龍彭飛熊各受重傷張應龍旋亦身死李元度見時已向晚傳令收隊入城查點各勇陣亡七人受傷五十一人二十一日黎明賊在西城搭造望樓有賊酋黃帽黃衣登樓瞭望我軍用兩劈山礮指擊一發下之是日衢州



鎮總兵李定太自江山派寶勝勇千人來援平江左營童梅華  
右營郭式源等亦自廣豐會同廣信府防勇祥字豫勝等軍來  
援士氣愈壯賊之凶鋒稍斂矣二十二日賊復於東北隅添營  
三座常山來路已斷李元度等以此路不可不通令彰奇武威  
同字及兩中營從東門出隊直搗新紮之營時近黃昏賊不爲  
備立將三營蹋盡殺賊約二百餘名奪獲旗幟六百餘面正鏖  
擊時李元度見三里街一帶之賊均往東城救應遂潛飭水師  
登岸將南門對河之街房焚燒其地與三里街郭家洲賊館相  
連風勁火烈一律延燒該逆撲救不及勢甚慌亂三更候燒及  
賊之火藥館煙燄沖霄聲如巨霆各營乘勢開城出擊連破大

西門賊卡三處賊不能支盡棄行李輜重狂竄德興一帶我師  
黎明跟追殺賊二百餘名生擒四十七名奪獲軍裝旗幟數百  
件騾馬三十一匹窮追三十里始行收隊此十五日至二十二  
日玉山縣城力戰解圍之實在情形也伏查廣玉兩城當浙江  
福建江西三省之衝與安徽之婺源相距亦不過二百里一有  
疏虞則四省震動候選道李元度以一軍分守兩城身受鎗傷  
苦戰旬日卒能殺賊解圍保全大局李元度自衡州從軍以來  
備嘗艱險百折不回上年臣丁憂回籍該員以孤軍支柱東路  
屢能以少勝眾此次力保兩城較之上年之守貴溪厥功尤偉  
可否籲懇

奏稿卷十二  
賞加按察使銜並

賞給勇號其平江各營可否擇尤保奏之處出自

天恩陣亡之把總易金榜李傳綸龔茂發張應龍外委龔拱綸  
八品職銜監生李家純監生黃查請

旨飭部照各該員本職從優議卹以獎忠義而勵將來所有廣  
豐玉山兩城力戰解圍各緣由理合恭摺由驛六百里具奏伏  
乞

皇上聖鑒訓示施行謹

奏



遵 旨移師援閩摺 咸豐八年八月十二日

奏為遵

旨移師援閩擬從崇安進剿敬陳現在賊情軍勢恭摺奏祈

聖鑒事竊臣自六月十六日長沙拜摺後旋於二十四日行抵

武昌與督臣官文撫臣胡林翼籌商轉運事宜七月初四日抵

蕪水縣屬之蘭溪晤巡撫銜浙江布政使臣李續賓商調所部

總兵銜副將朱品隆前營湘勇五百名副將唐義訓強字營湘

勇五百名隨同援剿十二日抵湖口縣與福建水師提督楊載

福布政使銜廣東惠潮嘉道彭玉麟定議於該處設立轉運局

臣在湖口患病四日二十一日行至南昌與江西撫臣耆齡籌



商進勦機宜二十三日疊據廣信探報僞楊國宗帶大股賊數萬從福建浦城竄出二度關圍攻廣豐玉山二縣廣信各屬戒嚴臣卽於二十四日起程馳援東路途次承准軍機大臣字寄七月初十日奉

上諭本日據和春何桂清趙德轍奏福建情形危迫請飭曾國藩改道馳援一摺前因浙江軍務緊急諭令曾國藩赴浙勦辦現在衢州業已解圍處州等府縣亦相繼克復境內餘匪不難剋日肅清惟閩省浦城崇安建陽松溪政和等處賊勢蔓延亟應趕緊勦辦和春等現飭總兵周天培於援浙兵勇內挑選精銳三千數百名由龍泉一帶進勦饒廷選帶漳州兵勇亦馳往

浦城曾國藩業已奏報起程著卽以援浙之師由江西鉛山直  
搗崇安相機進剿迅將閩省各匪一律掃除毋少延悞曾國藩  
赴浙援剿所需軍餉著官文等仍遵前旨由湖南北按月籌銀  
各二萬兩解赴曾國藩軍營以資接濟將此由六百里各諭令  
知之欽此旋接准部咨七月二十日內閣奉

上諭和春奏浙江軍務平定請旨可否毋庸赴浙等語浙江被  
陷郡縣經周天受督兵先後克復全境漸就肅清和春著毋庸  
前赴浙江總兵李定泰前令幫辦和春軍務此時周天受等會  
剿竄閩各匪著總歸曾國藩調度曾國藩未到以前卽歸慶端  
調度欽此又七月二十二日內閣奉

上諭周天受奏浙江軍務將次完竣擬卽帶兵前往福建助剿等語署福建漳州鎮總兵周天受著加恩賞還提督銜卽著馳往福建與周天培饒廷選張騰蛟等分路進剿俟前任侍郎曾國藩到後卽歸曾國藩調度欽此伏思浙境旣已肅清其自浦城竄犯廣豐玉山之僞國宗楊逆復經官軍擊敗竄往德興婺源一路而去臣同日另摺具奏其現擾閩境者疊據探報僞翼王石達開尙屯踞崇安縣境之星村黎源一帶地方及建邵各屬總兵周天培等已入浦城又據九江道沈葆楨候選道李元度稟稱訊據賊供僞國宗楊輔清與石逆共帶賊黨十餘萬楊逆先踞浦城石逆自衢處敗竄入閩窺犯延建等郡本年五月



內楊逆仍假楊秀清偽號自稱東殿石逆妒之互相仇殺楊逆遂帶賊六七萬棄浦城而出犯擾廣豐玉山分道而馳石逆尙有七八萬眾盤踞閩省各屬未能測其所向各等語臣於八月初八日行抵河口鎮前奉

諭旨飭調之張運蘭蕭啟江兩軍及臣在湖南帶出之吳國佐

一軍在湖北撥出之朱品隆等一軍均已陸續到鎮惟道員蕭

啟江前經奏明給假兩月日下尙未回營伏查賊渠以石逆爲

最悍其誑煽莠民張大聲勢亦以石逆爲最譎臣謹遵

諭旨卽日親督兵勇由鉛山入分水關直搗崇安由崇安而東

北可出小關仙霞嶺仍趨廣豐玉山一路以達於皖境由崇安



而南約有三路東路出建陽葉坊以至延平府西路出光澤龍湖以至建甯縣中路出麻沙挈口而至將樂則可達於汀州而遁入廣東矣現在署督臣慶端駐紮延平東路當可無虞西路各境在在與江西毗連現經撫臣耆齡調派布政使銜江西候補道劉長佑一軍由撫州移防新城瀘溪嚴扼杉關等隘口或無回竄江西之慮其或北歸皖省併入賊黨南回廣東仍返老巢均在意中目前未與接仗不能遽測其所之俟抵崇安後探確賊蹤再行縷晰具奏所有遵

旨援閩卽日由崇安進兵並現在賊情軍勢恭摺由驛六百里馳奏伏乞

皇上聖鑒訓示遵行謹

奏

硃批覽奏均悉欽此

										<p>臣等謹將前次 奏明各款開列 於左</p>
--	--	--	--	--	--	--	--	--	--	---------------------------------

攻克安仁縣城摺

咸豐八年八月二十四日

奏爲閩賊分股回竄江西擾入瀘溪金谿屯踞安仁官軍移師截剿攻克安仁縣城恭摺奏祈

聖鑒事竊臣軍改道援閩擬由崇安進剿業於本月十二日在河口鎮馳奏在案拜摺後正在料理成行疊接探稟邵武光澤之匪分股萬餘人竄出鐵牛關直犯瀘溪時候補道劉長佑分軍防守瀘界初七日迎擊獲勝以追剿過遠另股賊乘空撲營遂至失利該逆擾入瀘溪初九日竄入金谿十一二等日分擾許灣鄧家埠一帶十三日竄入安仁撫建饒廣處處戒嚴臣以江西腹地并臣軍後路所關必須先行掃蕩方可入閩爰於十



四日飭調道員張運蘭率老湘營自河口拔營往勦臣亦於十

五日移駐弋陽以便調度張運蘭等行抵貴溪探報該逆將趨

萬年樂平歸併皖南即與候選知府王文瑞分爲兩支橫截樂

萬去路賊遂折回安仁踞城抗拒臣於十七日加派主簿吳國

佐帶義字營由弋陽馳往策應并調平江營戰船及水師濟勝

軍扼截安仁河面使賊不能南渡十九日卯刻張運蘭等折赴

安仁行抵青山鋪命老湘營一二旗伏山之右副湘營吉左營

伏山之左自率六旗及侍勇出中路誘賊該逆登陴堅守另以

悍賊數千埋伏城外見官軍無多徑犯中路張運蘭鳴鼓爲號

伏兵從左右殺出適王文瑞帶隊分三路馳至我軍力戰呼聲

震天該逆敗退入城張運蘭等跟蹤追進藍翎千總擬保守備  
周玉田暨外委李益和文春陽首先入城死之逆黨閉關抗禦  
矢石如雨各勇遂從兩旁攀堞而登縱火先燒民房以斷街道  
水師戰船自南面轟擊該逆無路可逃城內伏尸山積約斃四  
千餘賊餘黨奪路狂奔張運蘭等復出東北門分路追殺又斃  
賊約二千人溺斃千餘水師轟斃數百生擒一百七十六名奪  
偽印二十顆偽官照十一張騾馬百餘匹繡袍繡帽旂幟軍械  
之屬數千件內有繡龍紅泥轎一乘爲向來所未見吳國佐一  
支因繞道包抄於城破後數刻始到次日仍分路奮追王文瑞  
等追二十餘里殪賊無算吳國佐追至萬年境內尙未收隊此

十九日攻克安仁縣城之實在情形也臣查該逆自閩竄出牽

制我軍後路往來飄忽幸獲殲除訊據賊供此股人數萬餘係

石逆前隊偽經略楊在田所帶逃去者不過二三千名等語惟

石逆是否尚在閩境未得確探如無另股竄出臣擬改道由瀘

溪入雲際關至光澤進剿延邵各屬惟聞景德鎮尙有大股果

否內竄撫建尙未可知臣當專視悍賊所在以定趨向按察使

銜卽選道張運蘭從前路兜截遲速攻剿皆合機宜可否

賞加勇號候選知府王文瑞可否以道員歸部儘先選用水陸

各營出力員弁兵勇可否擇尤保獎之處出自

天恩陣亡擬保守備藍翎千總周玉田請照守備陣亡例



飭部議卹以慰忠魂所有官軍移師回剿攻克安仁縣城緣由  
謹會同江西撫臣覺羅耆齡恭摺由驛六百里具奏伏乞  
皇上聖鑒訓示施行謹  
奏





移師由杉關入閩摺

咸豐八年九月十三日

奏爲閩賊大股回竄江西新城官軍移師建昌由杉關入閩恭摺奏祈

聖鑒事竊臣軍回勦安仁竄賊克復縣城擬改道由雲際關入閩業於八月二十四日在弋陽縣馳奏在案拜摺後於二十七日拔營二十九日行抵雙港節據探報閩賊大股三萬餘人回竄新城道員劉長佑扼守隘口連日苦戰雖疊獲勝仗而該逆愈來愈多更番猛撲又吉安城中八月初十夜乘大解衝出追殺未盡之賊尙餘數百人沿途裹脅復聚至千餘人連陷崇仁宜黃兩縣令殉難撫建各屬處處戒嚴臣以撫建兩城收復未

久民心易於動搖劉長佑一軍兵力本不甚厚其分防瀘溪各營曾於八月失利堵禦閩賊大股已慮難以支持復聞崇宜之警尤恐軍心不固民間喧傳石逆全股希圖回竄南城等縣飛書請援張運蘭亦稟請先救新城臣遂令張運蘭率所部兼程馳進臣亦改道南行回顧建昌途次接准江西撫臣咨開八月十四日奉

上諭崇安之賊竄出岑陽關現在鉛山河口處處戒嚴石逆又有竄往建甯爲回竄撫建之計是江西軍情亦形喫重曾國藩已於七月二十一日行抵江西省城其前部蕭啟江之兵已至廣信著耆齡飛咨曾國藩飭令該道亟籌堵剿該侍郎迅卽前

進探明賊勢趨向何處卽往策應是爲至要欽此石逆窺伺撫  
建之說遂已上達

宸聽

聖天子明見萬里無微不至臣督隊趨行初七日馳抵金谿聞  
劉長佑大獲勝仗自八月十九至九月初五等日竭力痛勦殲  
擒之賊不下二萬人奪獲騾馬至五百餘匹賊仍由建甯一帶  
竄去接見各團紳民無不稱爲奇捷鼓舞歡欣現建昌邊界均  
已肅清崇仁宜黃之賊亦由南豐竄入閩境臣於初九日抵建  
昌府城擬將撫建甯都各府州防勦事宜咨商江西撫臣妥爲  
布置卽率師由杉關入閩除劉長佑堵勦獲勝情形應由江西



撫臣奏報外所有臣移師建昌改從杉關入閩緣由恭摺由驛

五百里具奏伏乞

皇上聖鑒訓示施行謹

奏

調派官軍分道入閩摺咸豐八年十月十六日

奏爲調派官軍分道入閩現在辦理情形恭摺奏祈

聖鑒事竊臣移師建昌改由杉關入閩業於九月十三日在建

昌馳奏在案十四日札派張運蘭一軍向杉關進剿順昌將樂

之賊派蕭啟江一軍向廣昌進剿汀州甯化之賊派吳國佐一

軍赴南豐廣昌石城一帶擇要駐紮以爲蕭啟江後路策應分

派已定值大雨經旬勇夫多病二十四日張運蘭始能拔營蕭

啟江前經奏明給假回籍二十四日馳抵建昌卽於二十七

兩日分起拔營吳國佐二十六日拔營疊接閩省函咨洋口順

昌先後克復順昌將樂尙有餘匪未淨大股賊勢併注汀州分

擾甯化及江西之瑞金等縣據蕭啟江稟稱汀州甯瑞一府兩  
 縣賊勢浩大復有千刀會匪盤踞石城縣屬之迴龍砦臣批飭  
 蕭啟江先將石城會匪剿滅再行進攻瑞金俟江境一律肅清  
 然後進規汀州甯化適准閩浙督臣王懿德緘商請派勁旅由  
 邵武赴援汀州並另撥一旅堵賊由汀回竄瑞金石城之路與  
 微臣意見不謀而合查江閩交界中隔大嶺北自仙霞南至武  
 平一嶺綿亘殆逾千里大關小隘處處可通現派張運蘭由北  
 度嶺蕭啟江由南度嶺中間秦甯南豐等處尙覺空虛該逆仍  
 可伺隙回竄而二年以來賊匪往返蹂躪嶺內如建昌各屬嶺  
 外如邵汀各屬邑井蕭條百物蕩盡今歲疾疫流行居民鮮少

閩中田荒米貴油鹽無從購買且無現錢可換臣駐紮建昌一  
面防中路回竄之賊一面轉運錢米等件解赴蕭啟江張運蘭  
兩處計臣一軍分爲三起臣距蕭啟江四百餘里距張運蘭三  
百餘里而蕭張相距亦在五百里外擬俟張運蘭將順昌將樂  
賊匪搜剿淨盡歸併汀州一路臣亦率後隊繼進三軍先分後  
合庶無此剿彼竄之虞是否有當伏求

聖慈指授機宜所有調派官軍分道入閩緣由理合恭摺由驛  
五百里具奏伏乞

皇上聖鑒訓示施行謹

奏



Blank page with vertical lines and a central stain.

移軍剿景德鎮股匪摺

咸豐八年十一月二十六日

奏爲分調官軍追剿閩省竄賊並移剿景德鎮股匪恭摺奏祈  
聖鑒事竊臣抵建昌調派官軍分道入閩及各營患病情形業  
於十月十六日恭摺馳奏在案拜摺後張運蘭一軍行抵邵武  
府城節據稟稱順昌將樂業已無賊汀州甯化各城次第收復  
惟連城尚有餘匪人數聞亦無多大股逆賊併趨江西之甯都  
各屬等語接准閩浙督臣函咨大略相同又據蕭啟江及贛南  
道汪報閩先後稟稱閩賊回竄江西者約分三起一起長髮係  
石國宗統帶一起花旗大半皆南康萬安贛縣之匪係何先鋒  
傅檢點統帶一起廣碼係羅都督盧檢點統帶先竄瑞金會昌

雩都等縣近則三縣皆已無賊盡竄信豐及南安府界中意在  
窺伺贛州回竄廣東等語又據劉于濤彭玉麟先後稟稱景德  
鎮官兵於十月二十八日失利鱖魚山營壘被陷賊氛日熾恐  
其內犯廣信下游東流縣復陷恐其合景德鎮股匪再竄湖口  
擾及九江各等語稟報到臣伏查臣現駐建昌東有福建連城  
之賊南有信豐之賊北有景德鎮之賊以遠近言之去臣營皆  
在五百里以外以緩急言之連城之賊其數尙少其勢已衰閩  
事不足深慮信豐之賊或圖踞贛南或謀竄楚粵均屬可虞然  
愈趨愈南愈去愈遠追逐不及尙有畏避官兵之意景德鎮之  
賊無論東犯廣信西犯湖口皆爲莫大之患疊接湖廣督臣等



函咨自三河敗潰安慶撤圍大江北岸業已防不勝防若使南岸彭澤湖口復有蹉跌則九江亦且岌岌可危就大局而論景德鎮情形又較重於南路江西撫臣耆齡亦兩次函咨商請撥兵往援適值汀州甯化肅清之後張運蘭自閩折回將赴甯贛臣因調之馳回建昌面商機宜卽日令其赴景德鎮與劉于濬會同勦辦縱不能助江北之勢但使保全饒州湖口卽於九江兩岸不無裨益其信豐南安之賊一面飛咨江西撫臣飭地方官認真防守一面札飭蕭啟江跟蹤緊追以冀痛加勦洗不留餘孽是否有當理合恭摺由驛五百里具奏伏乞

皇上聖鑒訓示施行謹



奏

奏科卷二

五

遵

旨斟酌具奏摺

咸豐八年十二月十一日

奏爲遵

旨覆奏仰祈

聖鑒事竊臣

分調官軍追剿閩省竄賊並移剿景德鎮股匪業

將辦理情形於十一月二十六日恭摺馳奏在案二十八日承

准軍機大臣字寄十一月十一日奉

上諭駱秉章奏楚軍失利閩賊漸遠請飭曾國藩移師援皖一

摺李續賓一軍進攻三河全軍失陷至今尙無下落都興阿圍

攻安慶之師亦經撤回宿松一帶皖北賊勢鴟張楚省邊防喫

緊諒曾國藩亦必有探報此時閩省之賊已南趨漳泉距江西

漸遠若照駱秉章所請令該侍郎移師赴皖而留蕭啟江所部  
四千餘人防守江西亦未始非權衡緩急之計惟曾國藩所部  
各軍多染疾疫前奏尙須休息且景德鎮尙有大股逆匪隨剿  
隨進亦非計日可到著曾國藩預爲籌度如果閩省賊匪本省  
兵勇足資剿辦而江西邊境防剿有人自以赴援皖省尤爲緊  
要不但廬州省城可收南北夾攻之效卽上竄湖北之路亦可  
藉資堵扼倘因汀州甯化等處尙須兵力一時不能移軍或須  
俟景德鎮股匪殲除再回楚北亦著斟酌具奏將此由六百里  
諭令知之欽此臣伏查近日賊勢以皖江南北兩岸爲最重皖  
南約分兩路中隔大山如彭澤之浩山祁門之歷山績溪之鄣

山以及黃山九華皆此一山之所綿互自山以北如貴池銅陵下至蕪湖當塗濱江各屬自咸豐三年以來久爲粵匪出沒之區自山以南現惟婺源景德鎮兩處有賊兩處之賊不除則饒廣徽衢四府時時可危若能驅除兩處之賊逐出山外歸併江邊則江浙兩省防務皆鬆而皖南亦有一條鞭之勢辦理較易得手皖北約分兩路中隔一湖周圍四百餘里名曰焦湖白湖以南如安慶無爲巢縣和含各屬久爲粵匪盤據之所白湖以北如廬州鳳陽以及淮北各屬則粵匪與捻匪錯雜紛擾幾至汗漫而不可收拾前此都興阿之師由石牌進攻安慶勢趨湖南卽臣五年二月摺內所稱外一路者也李續賓之師由舒桐



進勦廬州勢趨湖北臣五年摺內所稱內一路者也自十月

中旬三河桐城相繼挫敗安慶撤圍湘軍死者逾五千人士氣

大傷逆氛日熾皖北賊勢之浩大實倍甚於皖南逮十一月初

將軍都興阿總兵鮑超屢獲勝仗湖廣督臣官文分派各軍防

布要隘撫臣胡林翼聞警起復馳赴李續宜軍中重加整頓楚

皖之交人心漸定而皖南白灣沘黃池之變戴文英鄧紹良先

後殉難亦恐其悉力上竄合景德鎮之股匪擾及湖口窺伺九

江以臣愚見論大局之輕重則宜併力江北以圖清中原論目

前之緩急則宜先攻景德鎮以保全湖口臣於前月二十六日

奏明後卽札張運蘭一軍於臘月初二日自建昌啟行馳勦景

德鎮計十四五可以接仗臣亦擬於正月初旬移駐鄱陽彭湖等處聯絡水師先固南岸屏蔽九江與宿松都興阿等營不過一江之隔百餘里之遙如果北岸有警亦可就近策應至

諭旨垂詢閩省賊匪江西邊防一節查福建之汀州甯化次第

收復僅連城有賊爲數無多臣前摺業經奏明本省兵力當足

以資剿辦閩賊之回竄江西者臣前次奏明盡入信豐及南安

府界中頃接稟報南安被圍信豐之賊亦尙未退蕭啟江所部

病勇新愈臣已飭其迅速追剿將來此股賊匪或久擾南贛或

分竄楚粵蕭啟江一軍或隨臣北行或留防南路應俟賊蹤旣

定相機調遣續行具奏所有遵

奏和卷十一  
旨斟酌具奏緣由恭摺由驛五百里馳奏伏乞

皇上聖鑒訓示施行謹

奏

硃批覽奏均悉所擬尙屬妥協欽此

通籌全局請添練馬隊摺

咸豐九年正月十一日

奏爲遵

旨通籌全局並陳近日軍情仍請添練馬隊以圖進取恭摺奏

祈

聖鑒事竊臣前調蕭啟江一軍赴援贛南張運蘭一軍進攻景

德鎮並遵

旨斟酌援皖事宜於十二月十一日恭摺馳奏在案嗣承准軍

機大臣字寄咸豐八年十二月初八日奉

上諭王懿德奏請飭曾國藩暫緩移師留張運蘭一軍保衛閩

境一摺曾國藩援閩之師前因所部兵勇多染疾疫暫駐建昌



調度徐圖拔隊繼進嗣值李續賓全軍失利皖北賊勢披猖經  
駱秉章奏請飭令該侍郎移師援皖留蕭啟江所帶四千餘人  
防守江西當經諭令曾國藩尙因汀州等處尙須兵力江西景  
德鎮大股匪徒尙未盡殲未能卽日由楚入皖令其斟酌情形  
具奏茲據王懿德奏接曾國藩咨稱擬率卽選道張運蘭等軍  
赴楚勦辦該督以閩省賊熾兵單連城尙被占踞接壤之饒州  
甯郡等府州紛紛告警專賴曾國藩大軍鎮定邊陲其前部張  
運蘭一軍已抵邵武轄境正資協勦未可撤回所奏亦係實情  
著曾國藩通籌大局如閩省賊匪猶賴援軍卽將張運蘭一軍  
暫留攻勦與王懿德會商辦理至湖北防堵現已周備惟皖南

北粵捻鬪聚有須兵力而江西地方尙有大股賊匪該侍郎亦難舍近而圖遠仍著斟酌調度可也將此由六百里各諭令知之欽此臣才識短淺何足以規畫全局就近處數省而論則安徽軍務最爲喫重江西次之福建又次之皖南中界一山皖北中隔一湖兩路賊勢臣前疏已詳悉具奏近聞福建之賊尙踞連城江西之賊竄入南安贛州戒嚴定南崇義相繼失守以臣愚見連城之賊閩省兵力應足了之南贛之賊人數尙多悍者較少非一枝客軍所能猝辦必須本省兵力輔以團練方可徐起有功惟安徽賊黨其氛甚惡其患方長大凡官軍與賊此消則彼長彼消則此長斷無中立之理我能進而勦賊則賊將竭

力禦我不暇他竄我不能進而剿賊則賊將乘隙犯我旁出四  
溢皖南無進剿之師則賊必東犯浙江皖北無進剿之師則賊  
必北犯齊豫故就一隅觀之則江西之南贛福建之連城均是  
賊黨均須兵力不可舍近而圖遠就全局觀之則兩利相形當  
取其重兩害相形當取其輕又不得不舍小而圖大舍其枝葉  
而圖其本根誠使大江兩岸各置重兵水陸三路鼓行東下剿  
皖南則可分金陵之賊勢即可紓浙江之隱憂剿皖北則可分  
廬州之賊勢即可紓山東河南之隱憂方今湖北全省肅清然  
與皖境處處緊接防不勝防者莫如湖北據上游之勢能制皖  
賊之死命者亦莫如湖北臣與官文胡林翼等熟商就現在之



兵力稍加恢廓北岸須添足馬步三萬人都興阿李續宜鮑超等任之中流現有水師萬餘人楊載福彭玉麟任之南岸須添足馬步二萬人臣率蕭啟江張運蘭等任之三道並進夾江而下幸而得手進占十里則賊蹙十里之勢進占百里則賊少百里之糧卽不甚得手而上游之勢旣重卽下游之賊不得不以全力禦我其於金陵廬州兩大營均足以抽釜底之薪而增車外之輔此遵

旨通籌全局宜併力大江兩岸之微意也至臣處近日軍情蕭啟江一軍白石城拔營南赴雩都據稟南贛各屬賊蹤蔓延力難兼顧臣批令專救贛州以保要郡不必旁顧他處張運蘭一



軍自臘月十七日馳抵景德鎮十九日吳國佐小挫一次二十  
七日張運蘭大勝一次開仗情形由臣月摺具報贛州居江西  
之極南景德鎮居江西之極北相距千有餘里臣駐建昌距兩  
軍各五六百里調度不靈轉運不便且兩處皆孤軍深入賊眾  
兵單日夜焦思無師可濟臣前次摺尾聲明蕭啟江之軍或留  
防南路或隨臣北行容俟續行具奏近日詳加體察顧此則失  
彼顧南則失北與其懸心兩地不若專力一方已咨商江西撫  
臣耆齡請其另調勁軍以剿南贛兼辦團練以散脅從臣卽專  
辦北路調回蕭啟江一軍歸併饒州彭湖等處在江西則臣管  
北邊耆齡管南邊在皖楚則臣攻南岸都興阿等攻北岸地有

分防斯責無旁貸師有定向斯士無二心免致到處牽掣一無  
所成此臣處近日軍情擬調蕭啟江并赴北路之微意也臣往  
歲在軍未聞賊匪能用馬隊近聞粵匪常以馬隊衝鋒捻匪則  
馬匹尤多李續賓三河之敗卽係賊馬數千爲湘軍向來所未  
見昨吳國佐景德鎮之挫亦爲賊馬所眩今欲整頓陸軍不得  
不添設馬隊東三省馬隊天下勁旅根本所在不敢多爲奏調  
臣與湖北督臣撫臣緘商擬由官文等奏調察哈爾馬三千匹  
請

旨飭上駟院押解來南潁亳一帶有善騎之勇可募名曰馬勇  
應卽添練新馬隊二千餘騎與都興阿之舊隊相輔而行於九

江  
湖  
口  
等  
處  
擇  
平  
原  
曠  
野  
馳  
騁  
而  
操  
習  
之  
惟  
以  
南  
人  
而  
騎  
北  
馬  
以  
勇  
丁  
而  
學  
弓  
箭  
非  
倉  
卒  
所  
能  
奏  
效  
臣  
願  
竭  
數  
月  
之  
力  
朝  
夕  
講  
求  
從  
容  
訓  
練  
期  
於  
成  
熟  
而  
止  
練  
成  
之  
後  
以  
二  
千  
匹  
交  
江  
北  
隸  
都  
興  
阿  
舒  
保  
等  
麾  
下  
以  
五  
百  
匹  
交  
江  
南  
隸  
臣  
麾  
下  
以  
壯  
步  
軍  
之  
氣  
而  
寒  
賊  
黨  
之  
膽  
餘  
剩  
馬  
匹  
遊  
牧  
於  
黃  
州  
鞍  
轡  
等  
具  
設  
局  
於  
九  
江  
以  
備  
隨  
時  
添  
補  
更  
換  
之  
用  
仰  
仗

皇  
上  
威  
福  
茲  
事  
若  
成  
皖  
豫  
等  
省  
軍  
務  
可  
期  
大  
有  
起  
色  
此  
添  
置  
馬  
隊  
臣  
願  
自  
任  
教  
練  
之  
微  
意  
也  
溯  
自  
咸  
豐  
六  
年  
洪  
楊  
內  
亂  
河  
北  
肅  
清  
武  
漢  
再  
克  
臣  
方  
慶  
幸  
以  
爲  
大  
難  
計  
日  
可  
平  
不  
謂  
遷  
延  
歲  
月  
粵  
匪  
未  
靖  
捻  
匪  
復  
滋  
餉  
項  
有  
日  
竭  
不  
支  
之  
勢  
將  
士  
有  
久  
疲  
思  
退  
之



心若非奮發精神變換局面將有類乎古人所謂情氣歸氣者  
不得不改弦更張亟思所以振之區區愚忱謹就近三省軍事  
遵

旨通籌全局恭摺覆奏伏乞  
皇上聖鑒逐條訓示施行謹  
奏



Blank manuscript page with vertical columns.

李續賓死事甚烈功績最多摺

咸豐九年正月十一日

奏爲巡撫銜浙江藩司李續賓死事甚烈功績最多恭摺奏祈  
聖鑒事竊臣於上年十月聞皖北三河鎮官軍失利比念李續  
賓剛烈性成必已見危致命惟相距過遠未悉其死事情形茲  
據其胞弟李續宜稟稱李續賓自攻克潛太舒桐四縣後遵  
旨進攻廬州因三河鎮爲舒廬衝要賊築僞城一座堅壘九座  
九月二十八日進紮三河十月初二日親攻九壘下之適粵逆  
陳玉成率大股賊自六合廬江來援捻逆張樂行率大股賊自  
廬州來援眾十餘萬晝夜兼程直趨金牛鎮連營數十里鈔大  
軍後路李續賓所部除留防九江及舒桐外隨征不過五千餘

人又攻壘血戰銳卒損傷過多遂飛調防兵策應未及至而賊已來逼初十日派隊迎擊金牛鎮戰樊家渡已獲全勝忽左路出賊數萬乘霧來鈔我軍迴戈返鬪前後受敵參將彭友勝游擊胡廷槐饒萬福等力戰死之餘皆截阻不能歸營李續賓自領親兵救應而偽城之賊復出與援賊相合我軍四面被圍初更時最後兩營李續燾彭祥瑞越壘衝出於是賊踞其壘斷我軍去路或勸以突圍退保無難再振李續賓曰某在軍前後數百戰每出隊卽不望生還今日固必死此有不願從死者請各爲計各員弁皆跪泣曰某等願從公以死報

國不願去李續賓具衣冠望

闕叩首二鼓向盡怒馬直出赴悍賊林立處死之臣胞弟曾國

華及何忠駿何裕王揆一李續藝吳立蓉萬斛源等皆死之而

副將李存漢道員孫守信運同丁銳義等猶督守孤壘以俟桐

城援兵至十三日亥刻子藥水米俱盡孫守信等死之十九日

賊攻桐城李存漢趙友財謝嗣湘李景均等死之桐城復陷凡

湘軍員弁兵役隨李續賓死者近六千人十一月三河附近紳

民從賊中覓得李續賓尸骸潛送霍山迎至黃州卽將返葬湘

鄉各等情稟報到臣伏查李續賓戰績自咸豐三年赴援江西

克復太和安福永興有江西湖南奏報四五兩年攻克岳州武

漢廣信等處有臣國藩奏報六七八等年攻克武漢九江皖北



各處有官文胡林翼等奏報各在案此次死事之烈官文等必  
詳奏請

卹惟臣與李續賓從事較久相知頗深有不得不瀆陳於

聖主之前者李續賓初援江西爲謝夢草營中幫辦嗣隨羅澤  
南征勦各處循循弟子退然若無所知不自表異人亦未有以  
異之逮岳州大橋之戰塔齊布獨稱湘勇白旗爲無敵賊亦深  
畏白旗白旗者李續賓所部右營也旣而田家鎮之役以少勝  
眾九江之敗士卒多逃散獨右營勇丁依依不去然後眾稱其  
賢得士心矣猶復粥粥無能轉戰江西岳鄂之間經過州縣不  
見一客稠人廣坐不發一語自楚軍之興人人皆以節烈相高

或涅臂自盟或歃血共誓慷慨陳詞預相要約李續賓獨默然  
深藏初不預作激烈自許之言然忠果之色見於眉間遠近上  
下皆有以信其大節之不苟臣所立湘勇營制編隊立哨略仿  
古法計事授糈皆有定程行之既久各營時有變更惟李續賓  
守法五年始終不變嘗謂臣曰立法者但求大段妥善行法者  
當於小處彌縫臣初定湘營餉項稍示優裕原冀月有贏餘以  
養將領之廉而作軍士之氣李續賓統營既多歷年已久節省  
贏餘及廉俸至數萬金不寄家以自肥概留備軍中非常之需  
咸豐六年冬曾寄銀五千兩於南昌濟臣糧台之急七年冬又  
寄銀萬兩至吉安濟臣弟曾國荃一軍又寄三千兩至貴溪濟

李元度一軍此外贏餘銀兩亦皆量力濟人不忍他軍饑而已  
軍獨飽往者故撫臣江忠源嘗論兵勇利病勇則畛域不分而  
患其蹤跡無定此之所革彼之所收兵則尺籍有定而患其界  
限太分勝不相讓敗不相救兵則規矩較肅而患無陷陣剛猛  
之風勇則銳氣較新而患無上下等威之辨故用兵以和爲貴  
用勇以嚴爲貴李續賓馭下極寬終年不見愠色而弁勇有罪  
往往揮涕而手刃之甲寅十月在田家鎮斬退怯之勇臣奏牘  
稱其有名將之風故刑人無多而歲久無敢弛慢至於臨陣之  
際專以救敗爲務以顧全大局爲先遇賊則讓人禦其弱者而  
自當其悍者分兵則以强者予人而攜弱者以自隨或攜隨數



次弱者漸強矣則又另帶新營以自隨江楚諸軍每言肯攜帶弱兵肯臨陣救人者前惟塔齊布後惟李續賓此次三河之敗亦由所部強兵分留湖北分撥臣處分防九江分駐桐城而多攜弱者以自隨其仁厚在此其致敗亦未始不由乎此此軍民所尤感泣不忘者也臣昔觀李續賓厚重少文百戰無挫私心慰幸以爲可躋

中興福將之列不意大難未夷長城遽隕督臣官文等具奏請卹想蒙

聖慈矜鑒臣與李續賓同縣姻戚不敢飾辭溢美亦不敢沒其

忠勲謹就夙昔所知瀆陳



宸聽伏乞

皇上聖鑒飭付

國史館查照施行謹

奏

曾國華殉難三河鎮摺

咸豐九年正月十一日

奏爲臣弟曾國華殉難三河鎮恭摺奏祈

聖鑒事竊臣自上年十月聞皖北三河鎮之敗卽知臣弟曾國

華同時殉難因道路遙遠傳聞鮮據專丁函詢李續宜及都興

阿鮑超等處又派人至舒城附近查訪旋接各路先後函稟三

河營壘於十月初十日被圍是夜二更後李續賓怒馬赴敵死

之臣弟曾國華與李續賓兒女姻親又謀人之軍義不可以獨

生亦衝騎赴賊中死之同幕諸客如何忠駿何裕王揆一李續

藝吳立蓉萬斛源等同時併殉惟孫守信復堅守兩日至十三

夜乃從容就義等情溯查咸豐五年十月翼賊石達開率眾由

湖北通城竄入江西勾結廣東匪徒周培春等自湖南茶陵州竄入與石逆會於新昌縣連陷瑞臨袁州三府六年春又陷吉安撫建三府臣所部諸軍羅澤南既先赴湖北周鳳山又敗於樟樹鎮臣不得已率水師入援省城而令李元度陸軍進攻撫州維時人心震驚道路梗阻楚軍不得通鄉書因募死士蠟丸隱語回楚乞救賊亦懸賞購奸民捕殺湖南致書者無一倖免臣幾有岌岌坐困之勢臣弟曾國華馳赴武昌乞師以救江西經湖北撫臣胡林翼奏委國華統領普承堯吳坤修劉騰鴻各軍赴援遂由咸甯蒲圻沿途迎勦取道萬載攻克新昌上高兩月之間連復六縣遂圍瑞州由是江西湖南始通音問而國華



積勞致疾就醫南昌與

臣

握手相見悲喜交集蓋以新募之眾

千里來援節節攻打摧江西十餘萬之賊鏖戰於酷暑烈日之

中艱險備嘗乃有此兄弟會晤之一日也病痊仍回瑞州督勦

七年正月

臣

赴瑞州與國華定計合圍掘長濠三十里斷賊接

濟二月丁父憂兄弟奔喪回籍厥後瑞城克復尙未變國華原

定之規模

臣

叔父曾驥雲無子以國華爲嗣八年二月降服期

滿四月李續賓調赴湖北奏明留營幫辦相與講求戎政晨夕

商酌國華性好讀史頗懷大志於古人艱危之境反復推究其

得失平昔持論過高

臣

恆誠之近日議論軍事漸歸於精細穩

實與李續賓兄弟意見多合十月初九日猶以家書寄

臣

稱援



賊鬻至各營意欲退保國華與主帥堅持不退二人謀合必不  
爲眾說所搖等語豈料其發信之次日卽爲效命之秋而其堅  
持不搖之計卽爲全軍併殉之機也七年五月閒欽奉

恩諭有曾國華帶勇援應一門忠義實深嘉尙之

褒跪讀之下感激涕零今幸臨危不苟仰副

聖慈捐糜以報

生成之德在門戶亦足增榮子弟得附忠義之林在臣心更復

何恨特以臣叔父年齒日高倚閭望切孤姪曾紀壽幼稚何依

臣六載軍中愆尤叢集卽手足私愛亦覺愧負良多建昌去舒

城千有餘里兵力不能遽及山川閒隔日月寢淹骸骨未收遺

恨難雪追思昔年若無國華援救臣無以至今日臣軍無以圖  
倖全卽江西亦無以轉危爲安憫念微勞不忍不瀆陳於  
聖主之前至於例得

卹典應由湖北督臣撫臣彙案具奏臣不敢妄爲乞

恩伏祈

皇上聖鑒訓示施行謹

奏



謝曾國華追贈優卹

恩摺

咸豐九年二月初九日

奏爲恭謝

天恩仰祈

聖鑒事竊

臣

弟曾國華上年十月初十日在三河鎮殉難情形

業經

臣

專摺奏陳在案昨准湖廣督

臣

官文恭錄咨會咸豐八

年十二月十八日奉

上諭候選同知曾國華著追贈道員照道員例從優議卹欽此

臣聞

命之下悲感難名伏念

臣

弟國華一介書生滿腔熱血鵲原急

難虎穴孤行爲畫救趙之謀曾作乞秦之舉轉戰千里連下六



城東道始通西江無恙乃長圍之甫合適銜恤以遄歸梓里言  
旋筠州亦克嗣以降服期滿重赴皖營與李續賓共濟艱危誓  
同患難逮三河之失利竟一蹶而偕亡田橫之客俱從先軫之  
元未返幸邀

恩卹得備哀榮

贈秩監司延光苗裔魂招千里淚滴九泉昔荷一門忠義之  
褒今叨百世馨香之典執干戈以衛

社稷聊攄自靖之忱聽鼓鼙而思將臣渥荷非常之

澤闔門銜感累葉增榮

臣仰沐

殊施愴懷同氣志不忘乎溝壑名已重於泰山在胞弟黃壤有

知敢忘結草銜環之報在微臣素餐無狀永矢卧薪嘗膽之誠  
所有感激下忱理合繕摺附驛叩謝

天恩伏乞

皇上聖鑒謹

奏



蕭啟江在南康勝仗摺

咸豐九年二月初九日

奏爲蕭啟江一軍在南康大捷攻克新城墟及池江等處賊巢  
現在馳救信豐以期力解城圍恭摺奏祈

聖鑒事竊

臣

於上年十一月檄調蕭啟江由石城赴援贛州業

經奏明在案接據該道稟報本年正月初五日行抵贛州其時  
南康喫緊兼署南安府周汝筠所帶各勇不敷堵剿遂於十六  
日抵南康查探得前陷南安之賊一支爲僞翼府宰制陳亨容  
傅忠信何名標一支爲僞渠帥蕭壽鏞蔡次賢一支爲僞尙書  
周竹岐李遇隆一支爲僞軍略賴玉新黃玉發一支爲僞承宣  
劉逸才張遂謀眾至七八萬希圖由南康直犯贛州在新城墟



地方築立僞城開壕列柵設望樓百餘座占踞村莊二十餘里其首逆則踞池江地方爲第二巢傳聞石達開尙在此路勢甚披猖十七日蕭啟江抵賢女埔因賊眾兵單可以智勝難以力取遂傳令偃旂息鼓商令管帶田勇之知縣周慶榕府經歷周慶夏等先行出隊誘賊楚軍設伏待之十八日出隊銜枚疾走埋伏赤石塘地方周慶榕帶田勇三千直逼新城墟誘賊出巢田勇者贛南團練按田派出之勇也賊素輕田勇鳴角出隊約六七萬人漫山遍野田勇開鎗數次佯敗誘之賊不虞楚軍之驟至也猛追七八里蕭啟江聲礮爲號伏兵四起先將去路截斷前營參將梁萬貴左營參將胡中和奇勝軍都司黎得盛由

左路截擊右營游擊毛治祺後營知府劉嶽昭新果營都司唐  
星照由右路截擊蕭啟江率親兵及中營游擊秦華祝副果營  
縣丞戴齡由中路迎擊賊見楚軍旂號天外飛來敗後丟棄軍  
械狼狽就戮伏尸徧地煙燄迷天田勇亦乘勢截殺南岸之賊  
該逆退過浮橋死拒胡中和梁萬貴率隊衝入正酣戰閒忽到  
悍賊七八千旂色鮮明與前迥異我軍殊死戰賊又敗北追過  
數里接應賊復至適我軍接應亦到追過新城墟十餘里踰麻  
布隴至小溪界申刻分番收隊往返九十餘里除田勇斬獲不  
計外楚軍斃賊二千餘名生擒二百一十名陣斬僞渠帥統戎  
檢點慶天候指揮將軍之屬搜獲僞印四十二顆大小旂五百

零八面均解建昌老營此十八日大獲全勝攻克新城墟之實  
在情形也二十日蕭啟江進攻池江賊巢謀報賊數甚少恐有  
詭謀行過麻布隴列陣以待蕭啟江自率數騎登高瞭望知有  
賊伏傳令勿進正收隊閒田勇之在前者忽蜂擁奔回先是十  
八之勝田勇奪獲賊賊最多遂益放膽是日集者約四萬人與  
楚軍隊伍相閒雜田勇見賊卽進被賊轟斃二人旋卽返奔伏  
賊大起官軍隊伍爲田勇所亂該逆愈撲愈眾胡中和毛治祺  
劉嶽昭黎得盛唐星照梁萬貴秦華祝等力戰斷後鎗斃殺斃  
二百餘賊都司龍復勝把總洪復勝等戰死各路無兵接應退  
至麻布隴仍卓旗迴馬衝擊數次返追二里斃賊百餘名斬僞



官二騎賊始退奔是役斃賊三百有餘生擒十九名奪僞印二顆我軍亦陣亡二百六十四名各將士憤欲再戰二十二日仍出伏麻布隴沿河一帶而以二三旂誘賊賊竟不出僅出數百人往來不定我軍奮追生擒三人而返據供十八二十兩役賊中死者逃者甚多蕭啟江等遂於二十四日再攻池江仍埋伏小溪一帶誘賊竟無影響久之對岸村莊出四五千賊捲旂而前我軍進擊轟斃多名田勇亦到賊黨奔逃我軍離營太遠遂未窮追立將池江小溪鳳凰墟長江墟等處賊巢焚燬敗賊均竄近南安府城一帶正欲跟追適接周汝筠函稟信豐被圍數月軍米告竭岌岌可危不能不先其所急且信豐崇義未靖遽



以孤軍進逼南安亦虞後路鈔截蕭啟江遂飭周慶榕等嚴紮  
新城墟要隘而潛率所部由龍迴一帶馳赴信豐西路總兵遮  
克敦布現紮信豐北路約定環攻冀可迅解城圍然後會合遮  
克敦布進攻南安庶兵力厚而無牽綴之慮此二十日小挫二  
十四日焚燬池江小溪鳳凰墟長江墟賊巢及現援信豐之實  
在情形也據蕭啟江節次稟報前來臣查南安各屬賊勢浩大  
經蕭啟江設伏制勝雖二十日小挫旋即鼓勇進攻該逆棄壘  
遁逃其氣已奪惟信豐官民苦守圍城數月若不竭力救援何  
以勸守土之吏且信豐崇義不能埽蕩亦未便孤軍深進臣現  
批飭如稟辦理一俟解圍後會合遮克敦布再圖南安庶勦辦

更易得手所有陣亡之都司龍復勝藍翎把總洪復勝陶泰益  
歐得勝朱源魯再高譚懷玉蕭清元把總謝明高藍翎外委涂  
清貴外委張連陞余鳳山蕭品南李春元章隆泉謝仁四陳高  
陞等十七員應請

飭部各照本職從優議卹以慰忠魂除飛咨湖南撫臣派兵從  
郴桂各屬以勦爲堵合力夾擊外所有十八日大捷攻克新城  
墟賊巢二十日小挫二十四日攻破池江等處賊巢及現援信  
豐各緣由理合會同江西巡撫臣耆齡由驛六百里馳奏伏乞  
皇上聖鑒訓示施行謹

奏

三

張運蘭攻剿景鎮情形摺

咸豐九年二月初九日

奏爲張運蘭一軍攻剿景德鎮小挫兩次大勝一次現仍守隘相持濟師助剿恭摺奏祈

聖鑒事竊上年十二月

臣

調張運蘭等進剿景德鎮賊巢節經奏

明在案該道等於臘月十五日由樂平拔赴柳家灣探得鎮賊三四萬人與婺源賊相爲犄角其輜重屯集浮梁悍賊盡聚鎮上將各要路挖斷築卡開壕設望樓煙墩數十座近鎮之上李村下李村橫亘二十里皆踞爲巢地勢散漫港汊紛歧進攻不易十九日道員王文瑞主簿吳國佐出隊由崖角嶺吳開嶺兩路進攻鎮之中路張運蘭由黃泥嶺雞腳嶺兩路進攻鎮之右



路派第五旂紫牛角嶺堵截鎮之左路行抵勝梅亭見左路老  
鴉灘出賊千餘當卽迎擊敗之斃賊數十追至下李村騎賊復  
出迎戰亦爲我軍所敗忽景鎮及上李村小港嘴回子墓各巢  
之賊一擁皆出約二萬人下李村賊欲愈肆守備扶正元等力  
戰死之王文瑞飛往接應擊殺數十賊賊甫敗退而小港嘴回  
子墓兩股斜鈔將我軍圍困守備何長庚等戰死其時吳國佐  
兩營爲老鴉灘伏賊所牽首尾不能相應張運蘭之營又相距  
數里派援之吉左營正遇伏賊鏖戰守備李冠羣等死之賊遂  
直撲王文瑞所占山岡都司朱寬義等力禦之迴合十數次併  
力衝突殺賊數十名守備朱正魁等皆沒於陣幸吉左營接應

時已日暮賊亦不敢進逼二更收隊是日斃賊四五百名副湘  
營陣亡四十八人義字營九十四人吉左營十二人緣各營均  
出六成隊賊蓋十倍於我也自後雨雪泥溜賊不敢出二十七  
日稍晴張運蘭預派第五旂紫牛角嶺六旂守湖角嶺吉左營  
守崖角嶺王文瑞派隊會同團勇站立中左右三路高嶺賊至  
則搖旗擊鼓以疑之布置定後張運蘭自率四旗從雞腳嶺進  
攻上下李村隨分一旂專斷浮梁援賊約副湘營兩面包鈔行  
抵李村該逆寂無聲響旋見白旗搖漾數十騎出站河岸我軍  
渡河迎擊賊已飛遁良久寂然申刻收隊忽角聲四起回視則  
賊隊已出萬餘四路來撲馬隊當先我軍轉隊列陣忽有賊目

八騎涉水衝來中路勇礮擊一賊落馬眾起逐之八騎皆殪張  
運蘭等遂乘勢分三路過河衝擊賊黨敗奔旋復回拒王文瑞  
等包鈔截擊呼聲震天時第一旗已將浮梁援賊擊敗又從北  
路橫截而來該逆棄械狂奔伏尸枕籍追至上下李村賊遂棄  
巢而遁縱火焚巢追至鎮市時已昏黑雨雪交加傳令收隊是  
日破上下李村二巢殲賊二千名解散脅從千餘名奪劈山礮  
八尊陣斬僞指揮楊大鵬郭正雲張明萬僞東殿後營將軍李  
正隴鄧見光陳金隴等尸邊搜出僞照自後我軍屢出賊不敢  
動本年正月十一日復出六成隊進攻列隊河岸自辰至午對  
面寂然惟墩台上烽煙四起浮梁來賊七八百鎮賊亦出千餘



倚山排陣馬隊隱約林閒我軍知有埋伏申刻收隊忽接探報是日大股賊圍犯道員劉于溥饒防各營旋忽退去始悟日中舉火者調賊回鎮也劉于溥一軍距張運蘭等六七千里而張運蘭派紮牛角嶺之第五旂人止三百名距老營又十六里是日我軍趨鎮藉解饒防之圍而回鎮之賊必從牛角嶺下經過竟以萬餘賊來撲嶺卡游擊王華國等出卡迎戰賊來益多遂回卡堅拒王華國等血戰終夜被賊撲去營卡陣亡四十一人張運蘭派第三旂往援已無及矣十二日辰刻加隊馳援將賊擊退賊亦回鎮不敢再犯第三旂仍紮牛角嶺堅守原卡此十二月十九日小挫二十七日大捷正月十一夜小挫之實在情



形也據張運蘭等稟報前來臣查鎮賊狡獪異常多而且悍避我朝銳擊我情歸楚軍現紮柳灣人止四千有奇距鎮三十里出隊六成進剿則眾寡主客勞逸飢飽之勢既已懸殊又爲地勢所阻易進難退劉于濤一軍屢不得手與張運蘭等相隔太遠呼應不靈而張運蘭王文瑞分紮要隘備多而力益分臣現添派九江道沈葆楨所統之平江前營中新左營由玉山赴鎮又調祥字營由弋陽赴鎮助剿並批飭張運蘭等以靜待動無庸遠出攻堅徒傷精銳除陣亡員弁現已片摺請旨賜卹及劉于濤一軍應由江西撫臣耆齡奏報外所有楚軍攻剿景德鎮情形恭摺由驛六百里馳奏伏乞

奏  
皇上聖鑒訓示施行謹